

Mioya Ye Shemaeta



Ki kakusasana, balikani. Ki tabo fa kuba mo kakusasana cwana, ni ka kuziba kuli kubona mina kaufela, lu lumela kuli Mulena una ni luna kacenu, ka kulufa muluti nyana, kuli hakuna kucisa hahulu mwahala mwa tabernakele mo kwa sebelezo ya kakusasana. Mi cwale luna . . .

² Na lumela, kana kuna ni banana . . . Kana banana ba zusizwe ku ya kwa litopa za bona, Muzwale Neville? Ni bona banana ba banyinyani babañwi, mi Ne ni hakanyeha haiba ba lukuluzi litopa kukena mwa—mwa libaka za bona, kukena mwa muzuzu wa bona wa sikolo sa la Sunda.

³ Cwale, mu ni lapelele. Nina ni keto yetuna yene Ni bata kueza maabani busihu, mi Nina ni kueza cwalo kacenu. Mi kelele shangwe ilukela kulapela. Nina ni—Nina ni mukopano otaha sunda yetaha, okaba kwani kwa Iron Curtain mwa Germany, mi kacwalo ki nto yeutwisa matomola pilu nyana. Mi mu ni lapelele. Mi kacwalo, ki, lwakona kukalisa mwa libapalelo lelituna la kiriketi mwa Germany, sibaka sana yahile Hitler ndwa isika kalisa kale, ki sibaka sesinde sesituna, siina batu ba bakuma fa eite sausande. Mi lwakona kuba ni sona ka masihu a lishumi, atatamani. Mi kacwalo lu sepa kukalisa kwani kapili cwanofu, mi ni kwa La Salle Lorraine, France, kuzwa fani, mi kona lukaya kwa Berlin, luka kuta . . . Ni talusa, Berlin mwahala kwani ni—ni France.

⁴ Mi lu ka kuta, haiba Mulena alata, kwa mukopano wa mwa Chicago. Kukala, Na sepa, la faifi, sikisi, sebene, eiti, ni naini, kona siemba sa ka mwa Chicago, kwani kwa mukopano wa kwa—kwa keleke ya Swedish. Mi cwale, ki Bo Boze, babañwi ba mina ba bazwa kwa Chicago, bana ni mukopano otaha kukala nako yetatama ya . . . kukala ka la wani Muyana, kamba wani Muimunene, ki cona, mwa Sweden. Mi Ni tabile hahulu kuziba kuli keto ya bona kuli ni ye kwateni, kulo kwani, neli ya kamuhelo yekwanile hande. Ne ni tabezi ka sani, kono Ni lukela kuya kwani kamba kuba kwanu cwale. Mu lapele kuli Mulena ani zamaise kuya kwa sibaka ko kukaba ni kupiliswa mioya yemiñata, mi zende ko lika ezezwa mwa Mubuso wa Mulimu. Cwale, bana ni mukopano kulo kwani, mi—mi bona mwa Sweden, mi ubulezi kuli lukaba ni batu ba bakuma fa twenty faifi, seti faifi sauzande ka kukala, kwa mukopano, mi buñata bwa bona ki baba si ka piliswa.

⁵ Mi cwale kwanu mwa Germany mo, kihande, bana ni sibaka sa kuezeza lipapali se si kona kuina batu ba bakuma fa eite sauzande. Kakuli, luna, mwa Switzerland ko lu sa zo zwa kwani, neluna ni mukopano omunde kwani, mi buñata bwa

mina mwendi ha mu si ka utwa kale. Mulena na lu fuyozu ka butuna luli, neluna ni baba sikuluhezi kwa bupilo baba likana fifite sauzande mwa masihu aketalizoho, kwa—kwa—kwa Zurich, Switzerland.

⁶ Mi kacwalo, Muzwale Jack Shuler, buñata bwa mina mwa muziba, ki wa Methodist, ki mushimani wa Bob Shuler muuna muhulu yani. Bainzi kwa Belfast cwale, mi—mi ba bulela kuli basweli kufufula mwa sibaka kwani, kaufela kwani, kubata Evangeli, mane ki babañata kufita bana nani Billy Graham mwa mukopano wa hae. Jack ki mucaha yomunde luli, yatezi ciseho ni lilato. Mi una—una ni busepahali hahulu ku zeo kufitela Ni lumela kuli ki mutanga yomutuna wa Mulena. Mi mulapelele Muzwale Shuler. Mi—mi ki Jack Shuler, ni Jack MacArthur ni yena ba inzi hamoho ni yena. Muzwale Jack MacArthur ki mukutazi yomutuna, ni yena. Mi kwani batu ba likeleke ba bulezi kuli ki ancafazo yetuna ni kufita yekile ya potela Ireland. Kacwalo lu na ni . . . Mube mwa litapelo zazi ni zazi ka baana—ka baana bani. Sibeli sa bona isali mitangana fela, mwatasi, nisepa mwa ma fote cwalo, Na sepa, kamba mwatasi, bana ni mabasi ni zeñwi cwalo, mi ki baluti babande ba batiile ba Evangeli, mi lwa ba lata.

⁷ Mi cwale, Ni—Ni lapela kuli hamuna ku ni libala, kuli—kuli Mulimu uka ni lumeleza kuli nibe ni keto ye lukile onafa cwale. Kuna ni linako fo mu sa zibi kwa ku fetuhela. Kana mukile mwa fita fa sibaka se si cwalo? Ni Paulusi nakile akena mwa sibaka sani nako yeñwi, nji cwani? Neli mwahala kutitihana. Mi cwale ha naya mwabuse, kupalañi, abona lingeloi mwa pono lene li mu bulelezi kuli, “Taha kwa Macedonia.” Kona kuli Mulena usana ni Lingeloi la Hae, nji Cwani? Haiba Ni kona fela kuba ya ikokobelize mwa pilu yaka ka zona sina mwa na bezi Paulusi.

⁸ Mi cwale, busihu bo, muhupule lisebelezo za Evangeli mo mwa tabernakele, mañi ni mañi muzwale kwateni. Mina baba li mwa Louisville, Ni bata kubulela kwa keleke ya Church of the Open Door, busihu bo, ka liholo zepeli, ka sebene seti kuisa ka naini seti, ku Muzwale Cauble. Ne ni lukela kutaha habeli kwanu. Mi luli ki muuna yomunde luli, mi u lizize ni yena. Mi Muzwale Cauble, ki mucaha yomunde luli, muzwale. Mina, Ni ziba hande kuli mu twaelani, ki muzwale yomunde luli, mi hani koni fela ku mu hanela cwalo. Mulapele. Fahalimwa lika kaufela, mulapele, mi mulapele kuli Mulimu alufe—alufe keto yende ya kuezwa.

⁹ Cwale, lusika kalisa kale Liñusa la Evangeli, luna ni kakusasana halu lukela kuneela bana babanyinyani. Mi Ni nani mwana ya lukela kuneelwa, nina, ku Mulena. Cwale, linako zeñata mwa likeleke zeñata . . .

Kana mwa utwa hande, kwa mulaho kafoo? Haiba mwa utwa, kana kwa utwahala? Ze fukisa moya zee kwanu, Nina ni

fela, hamukoni ku uutwahala ha mubulela. Batili, sani, sani si lukile. Ni saba kuli Ni ka shwa hakusina se.

¹⁰ Kacwalo he bana—bana ba banyinyani, fokuñwi ba ba fafalezanga mezi, mwa keleke, ha ba sa li limbututu zenyinyani. Mi, eeni sha, zeo li zwile mwa keleke ya Katolika, ka kueza bana ba banyinyani kuba bakreste, kamba “kukolobeza” mo ba ba bizezanga habasali fela ba banyinyani. Keleke ya Methodist kona yene li kalisize, za kukolobezanga limbututu, ni babañata, mi Ni sepa kuli ni babañata babañwi cwalo. Ni sepa kuli yeo kona shutano mwahala ba Nazarene ni ma Methodist ba kale, neli yona kolobezo ya limbututu yani, mi ni kuikaba ko kunyinyani ni zeñwi cwalo. Kono, ka nzila ifi kaufela, hakuna mukwa, Ha ni sepi kuli kuna ni butata hahulu. Kakuli, kasumulaho wa zeo kaufela, Ni sepa kuli Kalvari ne ibulezi lika kaufela hande, kulo kwani, ku zona kaufela, yeo ki niti, kakuli Jesu na shwile fani ili kupilisa banana ni kupilisa lifasi.

¹¹ Mi mwana yomunyinyani, hakuna taba kamba ki mushemi ya cwani yanani, kamba una ni sibi cwani, sani hasina kuba ni shutano ni yekana, kakuli Mali a Jesu Krete amu kenisa, mwabona, mi ye ki Ngunyana ya Mulimu ye takula sibi sa lifasi. Mbututu yani hakoni kubaka. Ha zibi mwa kubakela. Haana libaka la kuba faa, ka yena anosi. Hakoni ku mi bulelela libaka labezi teni faa. Kono ki Mulimu ya mu lumile kuba faa, mi Mali a Jesu Krete amu kenisa yona nako luli ya taha mwa lifasi. Mi konji ha ka fita fa siyemo sa kukona kuikalabela, fohe kipeto wa ziba bunde ni bumaswe, mi kipeto sa eza ulukela kubaka ku za ziba za fosize. Yeo ki niti. Kacwalo, babañwi ba bona baba fafalezanga tumezi, mi ba hupula kuli habayi kwa Lihalimu.

¹² Mi kuna ni tuto ye bulela kuli haiba mbututu upepilwe kwa bashemi babatezi Moya o Kenile, kihande, mbututu yeo ikaya kwa Lihalimu; kono, haiba ha ku cwalo, hakuna zende ku yona, mbututu yeo kipeto iicongile. Ao luli ki mafosisa. Ki shutano mañi yeliteni kamba ki bashemi babana ni Moya o Kenile? Kaufela zona ki takazo ya boozwa, mi ni mbututu upepwa ka mukwa o swana. Kacwalo, kaufela ba “pepezwi mwa sibi, ba bupilwe mwa bumaswe, batile mwa lifasi inge ba bulela buhata.” Ao, ao ki manzwi a Mañolo ka zeo.

¹³ Kacwalo, mi kipeto Mali a Jesu Krete a kenisa ni ku swalela mwana yania. Haiba na ka shwa, na kaya fela hande fapila Kubateni kwa Mulimu, hana ka pepwa kwa bashemi ba baezalibi hahulu mwa lifasi, konji afite fa siyemo sa kuziba kuikalabela ha sa zibile bunde ni bumaswe. Mi he sa eza, kuzwa fani, una ni kuswalelwa ka zona. Una ni kuikupela kubaka kwa hae kuzwa fani kuya kwapili. Kono haiba usali mbututu. . .

¹⁴ Cwale, mo lu likela kulatelela, mo mwa tabernakele. Kona fela sibaka sinosi mwa lifasi ko Ni yanga, Ni kuluka Tuto, ki kwanu kwa tabernakele, kakuli ye ki keleke ya luna. Mi lu luta

Tuto kwanu ili kubeya batu mwa sikuka hande. Baana babañwi, mwa likeleke za bona, ba kutaza ze balumela kaufela. Mi ki mizwale baka, mi lwakona kushutana hanyinyani, kono niteñi lu sa li mizwale ka kuswana fela. Mi, kono mo mwa tabernakele, lu kutaza ze lu nahana kuli ki Tuto ya Mañolo. Mi, mwateni mo, lu bona za kuneela kwa bana, ze lu biza kuli kuneela, nako inosi fela mwa Bibeles yelu fumana zeo, kamba kafoo mwa Testamente Yenca koo banana ba banyinyani nebana ni sa kueza kaufela, kamba Kreste fana bezi ni sa kueza neli mwa mukiti, kuli, Na ba nanuzi mwa mazoho a Hae ni kuba fuyola, mi ali, “Mutuhele bana ba banyinyani batahe ku Na. Musike mwa ba hanisa, kakuli Mubuso wa Mulimu ki wa baba cwalo.”

¹⁵ Cwale, lu siyezwi, kuya ka mo lu utwisiseza, ku lwala musebezi wa Na tezi kuto—kuto feza. Lifu la Hae fa Kalvari, Nali ni luma mi Aya kuzwa kwa . . . nazwile ku Mulimu, kutaha mwa lifasi, akutela ku Mulimu, kamba kuzwa mwa lifasi kuya ku Mulimu, ni kukuta hape mwa mufuta wa Moya o Kenile, mi una ni luna, mwahala ku luna, kuya kwa maungulo a lifasi, lueza musebezi mwa Keleke ya Hae o swana wa Na ezize ha Nali fa lifasi faa. Mi, ka sani, luisa bana ba luna ku mañi ni mañi, kwa bakutazi, mi ba ba lapelela, ku ba beya mazoho ni kuba neela ku Mulimu. Ki mukiti nyana fela wa ku bulela kuli lwa itumela ku Mulena ku sa luezelize ni bana ba banyinyani.

¹⁶ Cwale, haiba bana ba mina ba fafalelizwe fela, kamba nzila yeo kaufela ya kwa keleke ya henu, mo mu nahanela. Ha lu buleli sika sa kunyaza zeo. Kaufela ki zende. Kono, kuya ka Mañolo, lu fumana fela sibaka silisiñwi, fani kona fa na ba fuyozi Jesu, yena Kasibili. Fo Ni ka bala, haiba Mulena alata, ki mwa—ki mwa Linzwi mo. Lu fumana cwana, ku Muhalalehi Luka mwa . . . Ni lumela kuli ki—ki kauhanyo ya 10, ni kukalela fa timana ya 13.

Mi batisa bana ku yena, kuli aba beye mazoho: mi balutiwa ba hae ba omanyana baba batisa.

Kono Jesu abona cwalo, afilikana hahulu, mi ali ku bona, Mutuhele bana ba tahe ku na, mi musike mwa ba hanisa: kakuli mubuso wa Mulimu ki wa ba baswana sina bona.

Kaniti Ni li ku mina, Yo kaufela ya sa amuheli mubuso wa Mulimu sina mwana, haana kukena ku ona.

Mi aba nanula mwa mazoho, ni kuba beya mazoho, ni ku ba fuyola.

¹⁷ Seo ki sesinde? Mi ali, “Cwale, mutuhele bana ba tahe ku Na. Musike mwa ba hanisa, kakuli ba ba cwana, kuswana sina mwana yomunyinyani yani, Mubuso wa Mulimu ki wabona.” Mi A ba swala mwa mazoho a Hae ni ku ba fuyola.

¹⁸ Cwale, mo lu latela, kakusasana cwana, kameb nelukaba ni Jesu yainzi, inge aliteni, kwanu kwa katala, nelu kali, “Mulena, kikuli Ulata kufuyola mwana ke?” Oh, ha ki . . . ka meto a luna a

nama ni lipilu lutabela kubona cwalo. Kono U teni mo, nihakuli cwalo, kakuli Na lu file tumo ya kueza cwalo. Mi, sina mo lu ezelize, kona ni Yena mwa latela. Lu amuhela bona Ba lumile, kuamuhela Yena ya mu lumile, mwa bona. Kacwalo, Uteni mo kakusasana cwana. Mi haiba Kezeli Gertie uka taha kwa piano mi alize pina yaluna ya kale yene lu opelanga linako za kale, kuli, “Amu batise, mutise banana ku Jesu.” Ni lumela kuli itemi mwa buka mwani fokuñwi. Ha ni zibi hande. “Mutise banana ku Jesu.” Mi haiba muna ni mbututu, mbututu yenyinyani ye si ka neelwa kale, mi mubata ku i neela kakusasana cwana, kiñi, lu ka tabela kueza cwalo.

¹⁹ Mi kana kuna ni bakutazi kaufela mwa muyaho mo, bakutazi baba ka tabela fela kutaha ba to yema ni luna halunze lu neela limbututu ze ku Mulena? Luka tabela kuba ni mina, hamunze mutaha. Ku lukile, kana iteni mwa buka moo? U i fumani, Muzwale Neville? Ha iyo mwatani. Ku lukile, ki ba bakai baba iziba, *Mu Ba Tise*? Ku lukile, halu iopeleni cwale. Mañi ni mañi kaufela, bashemi bahame habanze batisa limbututu za bona. Ku lukile. Ku lukile.

. . . batise, mu batise,
 Mu batise kuzwa mwa sibi;
 Mu batise, mu batise,
 Mu batise bayambaeli ku Jesu.

Mu batise, mu batise,
 Mu batise kuzwa mwa sibi;
 Mu batise, mu batise,
 Mu batise bayambaeli ku Jesu.

²⁰ Halu inamiseni litho za luna fa nako nyana. Ndata luna yakwa Lihalimu, ka kuyema fa katala kakusasana cwana ku yemi baha ndate ni ba hame ba sweli lipeu zabona zenyinyani mwa mazoho a bona, bao Wena u file ku bona ka sishemo. Ba itumela hahulu ka bona, Mulena, mi basweli kubatisa kwanu kwa katala kakusasana cwana, mwa ndu ya Mulimu, ku to ba neela, bafa bupilo bwa bona ku Wena. Wena u ba file. Mi lwa lapela, Mulimu, kuli U babalele ni kufuyola mañi ni mañi wa bona. Ba etelele, mi Mangeloi a silelezo a Mulimu atonele ku yomuñwi ni yomuñwi. Ubafe bupilo bo butelele bwa nyakalalo ni tabo. Ha bahule kuba baana ni basali ba Mulimu, ba kamuso, haiba kuna ni kuba kamuso.

²¹ Mulimu, lu lapela kuli U zuse bakutazi ni bapolofita ni baluti kuzwa mwa sikwata sa limbututu zeli kwa katala kwanu kakusasana cwana. Mi hase lu supezi mi lu palelwa kuzwelapili hape, kuna ni ya lukela ku lu zwisa mwa sibaka, ha lukone kuyema ni kuutwa Evangeli haikutazwa ka ba bona babali kwanu kacenu. Lumeleza cwalo, Mulena. Mi ka zazi leliñwi la tabo musebezi ha u se ufelile, bupilo bwa luna hase bu felile, bashemi ba babali kwa katala, halube sina Jakobo wa kale ha

na fuyozi bana ba hae kaufela ni ku ba bulelela seo mafelelezo a bona nakaba sona mwa lizazi la maungulo. Mi a talima mwa halimu, ali, “Mwa ziba, Ni lukela kukopana ni sicaba sa hesu.” Mi ka zazi leliñwi lelinde, yena ni bana ba habo kaufela, ku kopana hamoho mwa naha yende. Ki kabakaleo Balami na bulezi kuli, “Mafelelezo aka abe sina a hae.” Mulimu, Ni lapela kuli U lumeleze limbuyoti ze fahalimwa bashemi.

²² Mi cwale haluya kwa kubeya mazoho ku bona, haki—haki bunde. . . Mi ha ki buikokobezo ni bo mo U ezelize, Mulena, kuli luna batu ba lifasi le lube ni lithonolo la kufuyola banana ka Libizo la Hao, ka kuziba hande, kuli, se lu kupa, lwa si fiwa. Haluya kwa ku ba fuyola, mi Jesu, yena Mutu ya bona lika kaufela, Ya mata kaufela ayeme bukaufi ni kufuyola mwana ufi kaufela halunze lubeya mazoho a luna ku bona ni kubafa ku Yena. Kakuli lu kupa ka Libizo la Hae. Amen.

²³ Muzwale Glenn Funk, una ni bana ba banyinyani babalalu ba hae ba bata kuneela ku Mulena.

[Hakuna manzwi fa tepu. Muzwale Branham uneela bana—Mu.]

. . . ki—ki kuikwalela nyana, kwabuse koo mwa naha yakwa mutulo, No sepisize mwana yo kuna. Ndate, mi cwale limbuyoti za Hao libe ku yena.

Joseph, mushimani waka, Ni kufa ku Mulimu. Mi bupilo bwa hao bube mbuyoti. Ha kube mupolofita, Joseph. Mi sishemo sa Mulimu sibe ni wena. Mi Mulimu wa ndataho, yena Mulena Jesu Kreste, aku fuyole kamita, aeze bupilo bwa hao kuba mbuyoti ku babañwi.

Ka Libizo la Jesu Kreste, Na mu fuyola. Amen.

[Hakuna manzwi fa tepu. Muzwale Branham uneela limbututu—Mu.]

²⁴ Mwa lata banana ba? Kuna ni sesiñwi ka bana ba banyinyani kuli me kaufela ubata kuli mwana hae a fuyolwe.

Cwale, cwalo kona Ndata luna wa Lihalimu mwa inezi ku luna kakusasana cwana. U bata kuli mañi ni mañi wa luna a fuyolwe. U luisa fapila lika zeñwi, ku lu tambeka zona fela, sina kubulela kuli, “Kifa, Ni bata kuli ufuyolwe, mwana Ka.” Kana Ha ki yomunde nji? Kacwalo lwa kona kuitumela Ndate wa Lihalimu yomunde ya cwalo.

²⁵ Cwale, mwa limbuyoti za limbututu zenyinyani, mwa ziba, Ne ni sweli kubala mo mwa Mañolo zazi leliñwi, fokuñwi mwahala mo, neli mwa Testamente ya Kale, fani, nto yetuna yani yene Ni—Ni itumezi hahulu ka ku ibala. Ki ye fa, ona fa. “Mi Natanaele ali ku Davida, ‘Eza kaufela se sili mwa pilu ya hao, kakuli Mulimu una ni wena.’” Mwabona? Eza se sili mwa pilu ya hao. Mi linako zeñata Ni—Ni fumana kuli, mulikani wa

Mukreste, kuli Ni bulezi lika ka ku sa ziba kuli ze Ni bulela, mi ni kuto fumana kuli za ezahala. Ze mu bulela!

²⁶ Neku bulezwi nako yeñwi, Jesu na tuluka kuzwa fa lilundu mi A bona kota ye ne si ka sika kuyona, neli matali fela kihona, mi nekusina muselo, mi ki Hali, “Kutokwe mutu ya ka ca se si beiwa ki wena kuzwa cwale kuyakuile.”

²⁷ Mi ka lelitatama habusa, habanze bafita, baapositola ba bona matali inge a omile. Ki hali, “Bona kota mo iomelezi kapili.”

²⁸ Jesu ali, “Mube ni tumelo ku Mulimu; kakuli se mulaka kaufela, ha mu lapela, mulumele kuli mwa si fiwa mi mukaba ni sona. Mi lika kaufela ze mubulela, mu ka ba ni ze mi bulela kaufela.” Munahane ka zeo. Oh! Mi mwendi kacenu, Moya o Kenile omutuna wa Mulimu, ha uyemi fa katala fa, mu bulela kuli . . . Kihande, ha ulukeli ku kabiswa. Hailukeli kuba sibaka sesiñwi se si buheha.

²⁹ Jakobo na hohile licwe nako yeñwi ni kubeya toho ya hae ku lona, mi li sa bizwa ni kacenu kuli ki Licwe la Sikono. Kamba, Licwe la Sikono, kuli batu babatuna ba lifasi ba sa lwalanga licwe lani kobaya, kuli malena ba kakulwe ki fahalimwa lona licwe le, ki licwe fela la kale le ne lili mwa simu.

Betele neli fela sibaka sa macwe ana bundami fahalimwa leliñwi ni leliñwi, mi yaba ndu ya Mulimu, sibaka sa kupila teñi. Jakobo ali, “Se nya ha ki sibaka fela kono ki ndu ya Mulimu.” Neli fela libunda la macwe fahalimwa leliñwi ni leliñwi.

³⁰ Ha si lwali lika zetuna ze buheha. Si lwala bunolo ni tumelo fa kulumela, kona ze eza lika. Sani kona se si eza lika.

³¹ Cwale, ka kuziba kuli nako cwale se iya ifela, luka lika ku sa mi buluka nako yetelele luli, ka kuziba kuli kwa cisa mi keleke itezi ya fufula. Kacwalo Ni ka ambola fela ku mina fa nako zenyinyani kakusasana cwana, fa tuto zenyinyani fa yekona kuba . . . Ni sepa kuli ikaba tuso ku mina. Mi cwale Na, ni si ka ya kale kwa hae, Ni ñozi lika zetalu kamba zene. Ne ni bulezi kuli, “Ni ka libelela mi ni bone seo Mulena ubata kuli ni bulele ha Ni ka fita kwani.” Ni ñozi lika ze silezi zenyinyani kulo fa, lituto zenyinyani, mi Ni ñozi iliñwi, ni ibeile mwa pokoto yaka sina cwana. Na hupula kuli, “Kihande, ha Ni ka fita fa katala mwendi Uka ni bulelela kuli bulele fa sika sisili.” Cwale se Nili fela kwahule sina mo Ne nibezi kwani. Kacwalo, nihakuli cwalo, Ni ka bala Liñolo fa, Mulena a lutuse ku Li utwisisa. Kauhanyo ya 14 ya Muhalalehi Luka, mi ha lu kaleleni fa seti- . . . timana ya 31 ya kauhanyo ya 14 ya Muhalalehi Luka.

Kamba mulena ki ufi, hana ni kupumela mulena yomuñwi, ya sa insi pili, akengeyela taba ya kuli ka mpi ya ba ba eza teni sauzande kana akakona ku yo lwanisa yani ya taha ni mpi ya ba ba eza twenti sauzande?

Hakusicwalo, yani ha sa li mwendi . . . kwa hule, a ka luma mandumeleti, ku yo kupa kozo.

Kamukwa ocwalo, mutu kaufela ku mina . . .

³² Ni bata kuli mulemuhe ka tokomelo. Cwale, pili Na ize . . . Ki nguli. Na ize, “Cwale, kuna ni mulela ya taha, mi una ni masole baba eza likiti zepeli; mi mulena *yo* uka mu katanyeza, mi yena una ni fela masole baba eza likiti ze lishumi. Kacwalo he, sa pili, uina fafasi ni kubuza haiba uitukisize, haiba wa kona kueza kamba nee.” Ku lukile.

. . . ku mina ya sa tobohi kaufela za luwile, hakoni kuba mulutiwa waka. (Mwabona?)

³³ Cwale he Mulena a ekeze limbuyoti za Hae kwa Linzwi le. Cwale halu inamiseni litoho fa nako nyana.

³⁴ Ndata luna yakwa Lihalimu, Wena Ya ziba lika kamukana, mi ha ukuteki mutu kamba muuna, kakuli mutu ki mañi kuli U mu bale? U bupile mutu, mi yena uswana fela sina palisa ya mwa naheñi: kacenu ki yende, kamuso wa kumulwa, ni ku nepelwa mwa ondo ya mulilo, mi kipeto wa letuka. Mi Na Ku lapela, Mulimu, kuli ube ni makeke ku luna kacenu mi eza kuli mutu ni mutu aiceke iliyena kacenu. Luteñi mo kakuba mwa ndu ya sikuluho. Luteñi mo ku toituta ni kuziba mwa ku pilela, mi haitahe kuzwa mwa Linzwi la Hao kacenu, O Mulimu wa Kuyakuile. Buñata bwa bana ba Hao ba kopani mwahala mo, mi buñata bwa bona ba bile bana ha Hao hala lilimo, kono, kakuba cwalo, luna kaufela lutaha kwa ndu ya Mulimu, ku to ituta, ku to ziba. Mi Na, mutanga Hao, ni lakaza kuziba zeñata za Hao. Mi Ni lapela kuli U tise susumezo ya Evangeli fahalimwa luna kaufela, ku mutanga Hao, ni Kubateni kwa Hao, mi u lu susumeze mwa muyaho wo, ibe yetuna hahulu kacenu, kuli ha lu ka zwa, mwa lipilu za luna, lu lakaze kuba batanga ba Hao babande, kuli kube ni bunde ku luna ka kuba mo. O Mulimu ya sishemo, lumeleze limbuyoti ze ka Libizo la Jesu, Mwana Hao. Amen.

³⁵ Cwale Mulena a ekeze limbuyoti za Hae kwa Linzwi halunze lu bala. Ni bata kunga tuto kakusasana cwana, yakuli, “Mioya ye elebelisa kamba Linzwi la Mulimu?” Cwale, kakuli ki tuto yena, kono ka kuba kuli ki mwa tabernakele. . . Mi la Bulalu biki yefelile busihu. . . La Sunda yefelile kakusasana Ne ni sweli kubulela nyana fa—fa tukuluho Evangeli.

³⁶ Mi la Bulalu biki yefelile busihu ne Ni sweli ku kutaza ka musali yana na ni—ni mulyani fa toho ya hae, kamba yona. . . Na latehisize iliñwi ya tuemba twa hae twa butokwa, mi nasweli kufiyela mwa ndu ni kulika ku i fumana muuna hae asika taha kale. Mi nelu fumani kuli musali yani neli mufuta wa luli wa musali, mi yena. . . na yemela Keleke. Mi lisale la sinawenga ne li sa tiniwangi kwa munwana. Ne li tiniwanga kwa toho, ina ni tuemba totu ketalizoho ka totune ku yona. Mi cwale musali haba lihule, neba comolanga kwateni kaemba kalikañwi ka silivera

ni kubonisa kuli neli lihule. Mi kacwalo musali yo a latehisa iliñwi ya liemba za butokwa, isiñi lihule. Kono muuna hae ha nali kwahule, mi yena ulika ku ka fumana kaemba kani, ni ku ka comeka kwa taulo ya hae, kakuli muuna hae ha naka kuta na ka ziba kuli na swasehile mwa buhule, mi ne italusa ku lelekwa mwa ndu ni zeñwi ze cwalo. Mi Ne ni tatuluzi sani fa nako nyana kwa keleke, na latehelwa ki lika zeñata hahulu zabutokwa. Mi seli nako ya Ndate kuli atahe, kacwalo luna ni kubata lika zeo. Cwale, ka kuziba mwa keleke, ni tabernakele ya luna . . .

³⁷ Mi Ni—Ni bata kubulela fa taba yeli *Mioya Ye Shemaeta*, ili yeo ika fiwa mukanga wa kuli *Kuituta Kaza Madimona*. Mu utwa hahulu zeñata ka za mioya ya madimona, mwa mazazi aa, kono muutwa zenyinyani hahulu ka mo mukona kuzwela mwateni. Luna kaufela lu—lu ziba hande kuli kuna ni mioya, kono, nto yetatama ki, mo mukona kuzwela mwa lika zeo. Mi cwale kuna ni . . . Kakuba, ka sishemo sa Mulimu, ki kolo yetuna hahulu ka kutalimela fa lika ze bizwa madimona zee, ni ku kopana ni yona kwa katala ni mwa muzamao wa zazi ni zazi, mi, kiñi, Ni tabela kutalimela mwa Mañolo kakusasana cwana ni kufumana kuli lika zani ki cwani.

³⁸ Cwale, lu libeile mwa sebelezo ya foliso, kamita ki kwa neku la foliso. Kansa, limbongola, tuale, butuku bwa maswafu, lika zani kaufela ha ki za nama fela, mi za buipiteli bwa moya mi ki madimona. Mañolo patalaza a tatulula cwalo. Kono ani ki madimona mwa mubili, ni bituma bye bi mela, inge kansa, bina ni bupilo ku zona, mi bupilo bwa zani ki dimona. Kuhula kwa kaale, kuhasana kwa butuku bwa maswafu, ni matuku amañwi, ki madimona. Mo ki mwa buino bwa nama.

³⁹ Cwale, kakusasana cwana luka bulela—bulela ka madimona mwa buino bwa moya mwa moyo. Ateni mwa moyo ka mukwa o swana sina mwabezi mwa mubili. Mi lu tamehile kulumela cwalo kuli lu abona mwa mubili wa batu, zeswana sina ma kansa ni—ni matuku ashutana ali mwa mubili wa mutu.

⁴⁰ Cwanoñu nyana, niheba kansa ibulezwi kuli ki butuku bwa mwa kalulo yabune, kuli ki mwa sibaka sesiñwi. Luli, ki tuto ka za madimona. Butuku buri kaufela ki butuku bwa mwa sibaka sa bune, makalelo a bona.

⁴¹ Cwale, kono cwale kansa mwa mubili kamba kansa mwa moyo, dimona yakona kutaha mwa sibaka sifi kaufela. Cwale, kuna ni linako zeñata ni batu babañata babana ni milelo yeminde kuli . . . ni batu babande babalika linako zeñata ku—ku yendamena fa tuto nyana yeñwi ya za bulapeli yeba nani, kamba nto yeñwi ye ba lutilwe kuzwa kwa bwanana, mi niteni ba sa fumana kuli sani mwahala a butu bwa bona, mwahala a moyo wa bona, kuli ba sa na ni sesiñwi se si si ka luka. Mina, babañata bateni mo kakusasana cwana, hakuna ku kakanya kuli kaufela ko mufumana Bakreste baba kopani hamoho, muka fumana batu

baba na ni mioya yeo ku bona, kuli bona. . . Ha li latiwi. Ha ba ilatangi. Ba bulela kuli, “Oh, kambe Ne ni ka tuhela fela kupuma! Kambe Ne ni ka tuhela kulakaza! Kambe Ne ni ka tuhela *se kamba sani!*” Cwale, yani ki mioya yelunya. Mi, cwale, itaha mwa mufuta wa bulapeli, linako zeñata. (Kakuba kuli ki sikolo sa la Sunda, ki nako ya kuluta, kacwalo ha lu talimeleni ku sona.) Cwale, itaha mwa mufuta wa bulapeli, linako zeñata.

⁴² Cwale, mwa Mañolo, nako yeñwi, nekuna ni muuna wa libizo la Jehoshafati, muuna yomutuna, muuna wa bulapeli. Mi aya ku mulena usili yanali mulena wa—wa Isilaele. Mi yena, Jehoshafati, nali mulena wa Juda. Mi aya ku Akabe, yena mulena wa Isilaele, mi ba yo kopana kwani hamoho, ni kutamahanya kueza silikani ni mañi ni mañi, ku yo lwana kwa Ramoth Gilead. Mi baeza cwalo kusina pili kulapela.

⁴³ Oh, kambe batu ne ba ka lemuha fela! Kona ha Ni tile kakusasana cwana ni ku mi kupa kuli mu ni hupule ha Ni ya mwabuse bwa mawate. Mwa lika kaufela, mulapele!

Yomuñwi natile ka zazi leliñwi mi ali, “Muzwale Branham, kana unahana kuli ku fosahalile kueza nto ya kuli?”

⁴⁴ Se nili, “Kiñi hauna ni puzo ka yona?” Mwabona? Haiba kuna ni puzo mwa munahano wa hao, u tuhele kihona, usike wa eza ni hanyinyani. Upile fela ni seo. Ha ukala kueza sika kaufela, mi haiba ki puzo yakuli si lukile kamba si fosahalile, inela kwahule ni sona. Usike wa kena ku sona nihanyinyani, konakuli uziba kuli u lukile.

⁴⁵ Cwale, lika kaufela lina ni kutalimwa ka tapelo luli, pili. “Mubate pili Mubuso wa Mulimu ni kuluka kwa Hae, mi lika ze kaufela lika ekelezwa kwateni.” Ni ziba hande kakusasana cwana, haiba baana ni basali nebaka kena fela sibaka sa moyo wa bona, minahano ya bona, mibonelo ya bona, hane ikaba ye petehile mwa meto a Mulimu, yeo ne i kaba keleke ye mata hahulu ku ze kile za ba teni.

⁴⁶ Mutalimele fela fa nako nyana ku za nama. Cwale, ki luna ba, lu nani, linako zeñata, se lubile mwahala lilimo limo, luna ni se lu biza kuli “mushini o lemuha buhata.” Mwakona ku sitama fa lizoho la mina inge waci, ku si pima hamoho ni—ni toho ya mutu, mi kipeto muyeme fani ni kulika kubulela buhata mo mu konela kucaindisa buhata bwa mina ku utwahala inge niti, mi sona si ka mi supeza kuli mwa puma nako kaufela, kakuli mutu na si ka bupiwa kuli ano bulelanga buhata. Kupuma ki kubulela buhata, ki nto yetata, mi ye maswe. Ne ni ka tabela kuina ni cakolwa bukaufi ni na, ka zazi lifi kaufela, kufita lihata. Mwabona? Ki lihata! Mi mubili wa mina no si ka bupiwa kuli ubulelange buhata. Hakuna taba kamba u muezalibi ya cwani, uslali mwana Mulimu ya wile. Mutu yatezi libi hahulu ni kufita mwa muleneñi wo kacenu, Mulimu na si ka bata kuli ube ni sibi. Na bata kuli ube mwana mushimani kamba wa

musizana wa Hae. U bupile ka siswaniso sa Hae Luli. Kono sibi kona se si kutiselize kueza cwalo. Mi hakuna taba ka mo likela kulikanyisa ni kuwaba wabisa kuli buhata bubonahale niti, bana ni sipangaliko sa sayansi se sip aka kuli ki buhata. Wa kona kubulela ka busepahali kaufela mo batela ku bulelela, kono niteni si ka bona negativu; kakuli kuna ni maikuto a mwahala mutu, mi ona maikuto a mwahali ao aziba sesili niti. Mi hakuna taba ka so bulela kwande kwanu, ona maikuto a mwahali ani aziba kuli ki buhata, mi si ka bonisa ze shutana ni maikuto a mwahali.

47 Kabakaleo, haiba muuna kamba musali ukona kuba ni mihupulo ya hae, ni bupaki bwa hae ni bupilo bwa hae inge bunamile handende ni Mulimu (amen) kufitela mubelekelo wa Moya o Kenile uba ulimuñwi hande ni Mulimu, ki sikamañi se si ka ezahala! Haiba nji muuna ni musali na ka yema fela hande, koo tukuluho ya mwa pilu ya hae, hamoho ni tumelo ya mwahali mwani!

48 Batu babañata ba tahanga kwa katala ku to lapelelwa, inge bana ni tumelo ya kunahana fela. Ba ipulela libi za bona ni kuikopanya kwa keleke, ka tumelo ya kunahana fela. Ba ilumela mwa minahani ya—ya bona. Ba lumela kakuli ba utwile cwalo. Ba ilumela kakuli ba ziba kuli ki mulao wa katengo kakande. Kono sani ha ki sona sa talimela ku sona Mulimu. Ha talimi fa tumelo ya kuikupulela kwa mina fela mwa toho.

49 U talimela fa pilu, koo mwahali kuna ni Mulimu. . . Mi ha lizwa mwa pilu, lika kaufela za konahala kanti. Buipuleli bwa hao bu ka zamaelela ni bupilo bwa hao. Bupilo bwa hao bu bulela ka kuhuwa sina buipuleli bwa hao mo bu ezeza.

50 Kono cwale buipuleli bwa hao ha bu bulela nto isili, mi bupilo bwa hao bupila nto yeñwi, kuna ni se si fosahalile kokuñwi. Fo kikuli una ni tumelo ya mwa toho, mi isi tumelo ya mwa pilu ya hao. Mi seo si bonisa kuli fande, *fa*, kuna ni zibo ya Mulimu; kono mwahali, *mo*, kuna ni dimona ya ku kakanya. “Ni lumela mwa foliso ya Bumulimu, kono ha ki ya ka.” Mwabona? “Ah, ikona kuba cwalo, kono ha Ni lumeli cwalo.” Mwa utwa? Kwande, u bulela kuli “eehe”; mwahali, lizwalo la hao libulela kuli “awa.” Ona nto ya sayansi yeswana yani neika bonisa kuli yeo ha ki niti, ya ku swabisa.

51 Mulemuhe cwale malena baa, ba si ka kalisa kale, neba lukela kuba. . . Mane Jehoshafati asika eza kale silikani ni Akabe, na lukela kubulela pili kuli, “Ha lu lapeleni ni lubone tato ya Mulena seo ili sona.”

52 Munife mukutazi, munife Mukreste, munife mufumahali wa mwa lapa yali Mukreste, munife mulimi, kamba mubeleki wa ko kupangiwa lika, yaka beya Mulimu kuwa wapili mwa lika kaufela, Ni ka mi bonisa mutu yo kuli uka kondisa za hae hakuna

taba ka za ka beya diabulosi ku yena. U buza Mulimu, pili. Luna ni kuba pili. . .

⁵³ Kono ne ba si ka eza cwalo. Ne ba apesizwe kaufela bona kakuli Akabe nana ni mubuso omutuna, mi na sa ezize lika zeñata hahulu, mi na apezi mukanjo wa hae, gauda ya hae ni silivera, neli muuna yomutuna, ya fumile, ibo nali ya sa lumeli.

⁵⁴ Mi fo kona fo kuinzi lifasi kacenu. Fani kona America fo iyemi kacenu. Fo kona fo liyemi likeleke kacenu. Lu yahile likeleke zeñwi zende ku ze kile za yahiwa fateni. Lubile bi babañwi ba baituti babande hahulu ku be lukile lwaba ni bona. Lu lutile lituto zende hahulu za bulapeli, ni zeñwi cwalo, ni kuituta kuopela inge Mangeloi, kono kanti kuna ni bufokoli fokuñwi. Kuna ni bufokoli, kakuli baile ka tuto ya mutu ni mioya ye shemaeta, bakeñisa ku kutela kwa Linzwi la Mulimu. Ba lika kueza lika kuswana ni lifasi. Ba likile kubeya lika ze benya ku lona, sina Hollywood.

⁵⁵ Kwanu zazi leliñwi, kopano ye zibahala hahulu, sikwata sa ba Evangeli Yetezi kwa Kansas City, kamba, mu ni swalele, mwa Denver, kwa mukopano, ye sweli kuyaha keleke ye likana wani milioni dollar. Mi likitikiti za bahasanyi ba linzwi ba libelela ma senti a mashumi a ketalizoho kuzwa mwa kopano yeswana yani, kuli baise Evangeli kwa bahedeni. Se lutokwa kacenu ki kutala ngana ya kuhasanya linzwi, ye lumilwe ki Mulimu, ancafazo yepepilwe ka Moya o Kenile, yekaba ni ciseho ya Mulimu, ku kashezwa mwa mishitu ya kwahule ni ku yo ezeza Mulimu sika, kufita kuyaha likeleke zetuna, zende ni ku lika kufita bo muyahile mabapa ni bona.

⁵⁶ Ne ni ka itakaleza kulapela mwa musebezi mwa simu, koi kona kufiyelwa, kamba mwa sibaka sa manwelo a bucwalo, mi nibe ni tukuluho ya Moya o Kenile mi lilato la Mulimu linze lituka mwa lipilu, kufita kuina mwa miyaho ya litempele zelunani mwa lifasi ni kutamelelwa mwa lituto ni lituto za bulapeli. Se lutokwa kacenu ki ancafazo ye zukuza, ku kutela kwa Niti, ku kutela kwa Linzwi la Mulimu hape.

⁵⁷ Cwale, hane ba zwezi kwani, mi neli kasamulaho wa nako nyana Jehoshafati aitetulula mi ali, “Kana . . . Kihande, ha lu buzeni Mulena ka taba ye.”

⁵⁸ Mi ali, “Ku lukile,” Akabe na buzize, mi alumile babañwi ni kuba ni mwanda, mianda yemine ya baktazi baba lutilwe. Mi a batisa kwani ni kubulela kuli, “Ba ki baplofita kamukana bona.”

⁵⁹ Mi kacwalo bakena ku za kuloka, mi ba kala kubiza. Mi se bali, “Eehe, zamaya u kambame ka kozo. Mulena una ni wena.”

⁶⁰ Mi cwale kasamulaho baplofita baba mianda yemine bani ni kufa bupaki kuli balukela kuya mwa kozo, kono niteni Jehoshafati ka a ziba . . . Kana mwa utwa nji? Mwabona, mwahali a pilu ya muuna ya lukile yani nekuna ni sene si mu

bulelezi kuli nekuna ni mulangu o no lila kokuñwi. Sesiñwi ne si fosahalile.

⁶¹ Akabe ali, “Cwale luna ni baba mianda yeminde fa, mi kaufela bona mwa buñwi, mañi ni mañi wa bona uli, ‘Zamaya, Mulena una ni wena.’”

Kono Jehoshafati ali, “Kana hamuna yomuñwi hape?”

⁶² Mi ali, “Kihande, ki sikamañi se lutokwa hape ni alimuñwi, kasamulaho lumano ba ni baana baba mianda yemine baba lutilwe mwa naha ye? Kaufela bona ba bulela kuli ‘Zamaya!’” Zani neli za nama. Kono mwahali mwatasa pilu ya Jehoshafati na zibile kuli kuna ni sene si fosahalile. Cwale, mi ali, “Luna ni alimuñwi hape, ki yena Mikaya. Kono Ni mu toile.” Ali, “Yena kamita ubulelange lika ze maswe, mi utahanga ha si na musebezi o cwalo, mi usweli kupwacaka likeleke ni lika kaufela.” Ali, “Ni mu toile.”

Ali, “Zamaya, mutise, mi lubone sa ka bulela.”

⁶³ Mi cwale Mikaya ataha, ki hali . . . Se bali, “Cwale, bona, ubulele ze swana inge babañwi kaufela.”

⁶⁴ Ki hali, ki hali, “Na fela . . .” Ki se fa. “Ni ka bulela fela sa bulela Mulimu.” Amen. “Hakuna taha ka sa bulela mupolofita wa henu, mi ni se se sibulela, ni seo keleke ya henu ibulela, ni se ba bulela. Ni ka bulela sa bulela Mulimu. Mulimu ubeile mwa milomo yaka mi Ni ka bulela Sa bulela.” Se lutokwa kacenu ki bo Mikaya babañata baba ka bulela sa bulezi Mulimu. Mulemuhe, kacwalo ba muisa teñi kwani, mi ki hali, “Amu nife busihu bo feela.” Kacwalo busihu bwani Mulena amu katana, mi ayo kuta habusa kakusasana. Mi malena bababeli inge Bainzi mwa munyako, ki hali, “Zamaya ukambame.” Ali, “Zamaya ukambame. Kono,” ali, “Ni boni Isilale inge lingu zesina mulisana.”

⁶⁵ Kacwalo mukutazi alimuñwi yo, kaufela bona neba tinile hande, ayema ni ku mubakula fa mulomo, mi ali, “Ki nzila ifi yeo Moya wa Mulimu noile ha U zwile ku na?”

Ali, “U ka iponela ha uka yo kuta.” Eeni.

⁶⁶ Ki hali, “Muteeleze kwanu!” Ki hali, “Luna lu batanga ba Mulimu. Lu baba mianda yemine, mi wena uinzi fela unosi.”

⁶⁷ Kono Mikaya ali, “Ni ka ku bulelela fokuli butata bwa hao.” Amen! Ali, “Ni boni pono.” Amen! Mi ali, “Mi Ni boni Mulimu ine ainzi fa lubona lwa Hae. Ni boni mpi ya Lihalimu inge ikubukani fapila Hae. Mi lu ziba kuli Linzwi la Mulimu li bulezi kale likuto ka muuna yo, kuya ka mwa na ezelize.”

⁶⁸ Ha mukoni kufuyola sa kutile Mulimu, kamba nihaiba yena diabulosi mane hakoni kukuta seo Mulimu afuyozu. Ki ndwa ya mutu anosi, hakuna taba kamba u mubotana ya cwani kamba sikuba se sicwani, kamba ha usika ituta cwani, ya si ka ituta. Sa

fuyози Mulimu si fuyozwi. Seo Mulimu akutile si kutilwe. Muzibe kushutanisa se si lukile ni se si fosahalile.

⁶⁹ Mikaya na zibile hande kuli yani ne si Mulena yanali ni bakutazi bani. Kihande, neli butata mañi bonebuli ni bakutazi bani? Mulemuhe sene ba ezize. Ne ba tinisizwe zende. Neba fepilwe hande. Neba tile hamoho mwa mukiti wa bona ni zeñwi cwalo, ni tamahano ya bona, kufitela ha ba yo ziba fela ka za tuto ya za bulapeli kipeto. Mi Bibebe ne ibulezi kuli Mikaya, hana sweli kotalimela pono, abulela kuli, “Mulimu uize, ‘Ki mañi ye luka biza kuli ayo puma Akabe?’ Mi moya wa buhata wali, ‘Ni ka ya ni yo puma Akabe ka bakutazi bani, kuli Akabe azwele kwani, kuli Linzwi la Mulimu li talelezwe.’”

⁷⁰ Cwale, kacenu batu babañata hahulu ba sweli ba teezeza. . . (Cwale, sikolo sa la Sunda, Na lata cwalo.) Mutalime, batu babañata ba sweli ba teezeza kwa mioya ye shemaeta mwa sibaka kunga Linzwi la Mulimu. Mioya, iteni mwa lifasi. Ki madimona. Mi ba zwela mwa libaka ni kuba mwahala baana, bakutazi. Ba taha mwahala ma membala ba keleke. Ba kena mwahala batu babande. Mi kipeto ba kena mwa butokwa. Mi ba bulela lika, ni kueza lika, ni kuluta lika, ni kueza lika, ze lwanisana ni Linzwi la Mulimu. Kacenu, bulumiwa bwa likopano za bona bu lumeleza sicaba sa bona kubapala makadi mwa keleke, buñata bwa bona. Cwale, ha ki Batolika kaufela bona, kuna ni Baipanguli babañata baba eza cwalo.

⁷¹ Se ba likile kueza ki kuyolisa nto yeñwi. Ba lika kuamuhela mulelo omunca. Ba likile kuyolisa tuto, kunga sibaka sa Moya o Kenile. Hamuna kukona kueza cwalo, hakuna taba kamba muuna wa mina uitutile cwani. Ni sepa kuli ki nto yende kuli abe ya itutile. Kono haiba nji haana Moya o Kenile ni zona zeo, tuto ya hae haina ku mutusa sesiñwi. Tuto haina kunga sibaka sa zamaiso ya Moya o Kenile. Amen.

⁷² Mulemuhe, bona, mwa sibaka sa Se, ba likile kuamuhela za kuswalana mwa mazoho kuyolisa kutwisiso ya kale yene lubanga ni yona. Kacenu keleke ibile mwa bunca. Ba yema ni kutambekana kamuhelo mwa kopano, mi cwalo kona moba eze lika. Kono halina kuyola sipula sa balili koo baezalibi ba bizizwe mi baba hande ni Mulimu. Yeo ki niti.

⁷³ Kacenu balika kunga sibaka sa sabulishumi sa Mulimu. Balika kuamuhela nto yeñwi. Ba lika kueza kuli ishutane. Ba zwela kwande mi ba yo bapala bunco mwa likeleke, kubapala za kulaula. Masheleñi a kulaula haana kuyola sibaka sa sabulimu sa Mulimu. Milaleo, kulekisa likubo, lipapali, kufumana mali akulifa likoloti ze shutana shutana, halina kuyola sibaka sa Kuyakuile sa sabulimu sa Mulimu ni lineo. Halina kueza cwalo. Kono ni cwalo lulika kueza cwalo.

⁷⁴ Ki sikamañi seo? Ki mioya ye shemaeta yetaha fafasi, yelika ku hatelela-. . . kuyolisa sesiñwi kwa Linzwi la Mulimu. Mulimu

haana sa kuyolisa Linzwi la Hae. Ki la Kuyakuile ni kamita. Mulimu hakuna sa nani sa kuyolisa tumelo. Tumelo haina sa ku iyolisa. Sepo haina kunga sibaka sa tumelo. Tumelo ki yona inosi. I yema inosi. Haina kunga si . . . Sepo haikoni kunga sibaka sa yona. Sepo ki kusepa ze libelezwi, ni kusepa ze sa bonwi, kamba tumelo icwalo, nitaluse. Mwabona? Sepo kinto iliñwi; tumelo ki nto isili. Sepo ya i sepela kwateni; tumelo ina ni sona. Yeñwi ki tumelo ya nama; mi yeñwi ki sinulo yezwelela hande ku Mulimu. Haina kunga sibaka sa yona. Lusweli lwa lika, kono lusweli kueza likaza kuyolisa ze kaufela.

⁷⁵ Lu lika kuyaha likeleke zetuna mwa sibaka sa kuluma bahasanyi ba linzwi. Ki kuyolisa kokuñwi. Jesu ali kuba asupe mutu kuli ayahe keleke. Ne li si ka tomiwa mwa Bibebe. Lu itomezi mikopano, ba tuhelezi zeo kunga sibaka sa kuhasanya linzwi. Luna . . . Jesu na si ka lu bulelela kuli luyahe likolo za bakutazi ba linzwi. Zeo kaufela ki zende. Tuto, ka kulika kunga zeo kuli liyole sibaka sani. Halina kueza seo. Tumo ya Jesu neli kuli “muye mwa lifasi kaufela mi mukutazi Evangeli kwa sibupiwa kaufela,” kwa nako ya maungulo. Kona kuli kaufela za kuyolisa ze lunani halina kunga sibaka se si sephala.

⁷⁶ Zazi leliñwi Ne ni ba ni kutwisiso, ya za kuyolisa. Nenina ni lusinga lwaka lwa pili, ne ni kumulisize liino. Kakusasana wo Nina ni liino la buhata le li comekilwe mwateni. Ha ni koni kubulela hande. Halina kunga sibaka sa liino la niti. Batili, sha! Oh, mawi!

⁷⁷ Mwakona kunga mutu ni ku mutinisa hande, ku mu beta fa kota, musili, kaufela se mubata kueza, ni ku mu kabisa hande hahulu. Yoo haana maikuto, haana lizwalo. Haana kunga sibaka sa mutu wa luli. Mane niyona cincho ya buhata ye zamaya ni kubulela kuli, “Ni ikenyize mwa keleke. Ni ka lika kueza zende.” Halina kunga sibaka sa buino bwa kale bwa niti, cincho ye lumilwe ki Mulimu, ya Moya o Kenile ye eza mutu kushutana mwa pilu ya hae. Haikoni kuba cwalo, kakuli hakuna Bupilo ku zona. Hakuna ze lukela ku mufa Bupilo.

⁷⁸ Kwanu ha ki kale hahulu Ne ni boni muswanisi ya sikwala yana tisize se sibetilwe sani, siswaniso, Ni taluse, yena yana ezize siswaniso sa Mushe se. Ha ni sa ziba libizo la hae cwale. Ki muswanisi wa mu Greek. Ne si mungezi nako ya bupilo bwa hae. Mi ha na fitile fa na hupula kuli ne ku petehile, akenelwa hahulu ki tabo bakeñisa siswaniso sa Mushe se, kacwalo a nata fa liñwele la sona, ni kubulela kuli, “Bulela, Mushe!” Ne si bonahala inge sa niti luli! Ne si basizwe luli ka swanelo konji ha si bonahala sina Mushe, kuya ka mulelo wa hae, kuli a si nata a sando kuli sibe ni maikuto.

⁷⁹ Si beya mwa munahano wa keleke. Hakuna taba kamba muyolisa zekuma kai, kamba muba ni kopano yetuna kufita kao, mo mu opelela hande lipina za mina, mo iapalela hande kopano

ya mina, mo mu ezeza *se, sani*, kamba *sesiñwi*, nemuka nata, ku utwa, kaufela. Halina kunga sibaka sa Bupilo, konji Kreste hataha fafasi mwa mufuta wa Moya o Kenile, kukena mwa keleke yani, ni kulika kutwisiso yenca ya kupepwa sinca hape. Halina kunga sibaka sa Linzwi la Mulimu. Linzwi la Mulimu liyema linosi.

⁸⁰ Mikaya nana ni Linzwi. Na zibile kuli nana ni Linzwi. Nana ni Linzwi leli ñozwi, nana ni Lona hape ka pono. Na zibile sa na bulezi Mulimu mwa Linzwi la Hae. Na zibile sa na bulezi Mulimu ka pono. Sibeli sa zona za taha hamoho. A ziba kuli neli Niti, kacwalo na si ka saba.

⁸¹ Kono moya o shemaeta wo, mutalime so ezize, kacenu. Kueza fela ma membala babañata ba keleke, kuba ni mamembala babande ba keleke, ki kutuhelela buino bwa tuto ya Moya o Kenile ya kale. Ne u lumelelize sicaba kuba ni mikiti ya kuitabisa ni yomuñwi ni yomuñwi, kukena mwa litebule mone ba bapala lipapali. Sani hasina ku yolisa ndu ya fahalimu, kone ba lapelela Moya o Kenile. Ne li lumelela basali kutaha hamoho ni kubulela lisheha ni ze cwalo, ni kuba ni zeñata sa lisheha ze bolile zesina lika mwahala zona. Zeo halina kunga sibaka sa mukopano wa litapelo. Basali, mukwa o ba zwela kwande ni kutina ka ona kacenu, ki—ki maswabisa.

⁸² Ne ni utwile mubulelelo wa na bulezi Muzwale Neville, kuli, “Sicaba se si botanile sa ma American,” ali, “ba lumile litino za bona kaufela kwabuse bwa mawate.” Yeo ki niti. Ha ba zamayi mwa litino za bona za tunekunda. Bona... Yeo ki niti. Neba lukela kulifa kwa bahasanyiba linzwi, kakuli bahasanyi... Sicaba ni bahedeni mwa linaha zeñwi basweli ba litina. Batu bapila kusina zona, ba bonahala inge kuli ba tabela cwalo.

⁸³ Ni ka mi bulelela, kuna ni se si lyangani, mi koki kukutaza kwa Evangeli ya Mulena Jesu Kreste. Ki madimona a mi tubulanga litino za mina. Nekusina ni yomukana mutu mwa Bibeley yakile apazula liapalo za hae, yani neli muuna yanatezi madimona. Mi utaha mwa buino bwa buiketo kacenu, inge kuli halina butata, inge kuli ki zende, inge kuli kaufela li lukile. “Ki moya o batelwa, mi li ka mieza kuikutwa kubatelwa ha mu tubula litino za mina.” Mutu azamaye zamaye mwa patelo, ni mapunu licika, ni basali ona cwalo. Kiñi, ha mu sa kutekeha kufita likute le li fiwa kwa linja, yomuñwi ni yomuñwi. Ki butata mañi? Ha ni liki ku mi holofaza. Ni lika fela ku mi bulelela kuli ki kutasezwa ki dimona, mi musweli ku utwela mioya ye shemaeta ye mi bulelela yeo, “kuli li lukile,” kono ki buhata.

⁸⁴ Peu ya buloto ika tisa fela buloto. Haiba u Mukreste, hauna kueza cwalo. Haukoni kueza seo. Batili haukoni kueza cwalo. Una ni tumelo ya kunahana fela mi ubulela kuli, “Muzwale Branham, Na lumela Bibeley.” Bupilo bwa hao bu bulelela kuli ha

u cwalo. Amen. Mioya ye shemaeta kulwanisana ni Linzwi la Mulimu.

⁸⁵ Na zibile fa na yemi, Mikaya na zibile. Nana ni Linzwi la Mulimu. Na li muuna ya na sa zibwi. Hakuna ya na mulata kakuli na bulela Niti, ni ha ne ba tabela bakutazi baa.

⁸⁶ Cwale, sika sesiñwi se siingile sibaka. Na lumela mi ni kunahana kuli muuna kaufela yana ni kutwisiso ni Mulimu, kamba musali, una ni kua ni maikuto nyana. Na lumela fela cwalo. Yeo ki niti. Kono mwa ziba kana? Ba yolisize kuba ni maikuto mwa sibaka sa kuba ni kolobezo ya Moya o Kenile. Baba fela ni lilata hahulu, mi hakuna sika mwateni. Mupile fela ka kukena sina mo mu pilela ka lilata, kipeto mukaba hande. Maikuto alukile luli ki amande; “kutiya kwa mubili kutuha hanyinyani.” Kono mioya ye shemaeta ikeni mwa sikwata sa batu baba kenile, mi bana ni bona kuli ba yendamene kuzona “kakuli bakona kuhuwa” kamba “bakona ku bina, kakuli bakona kuba ni maikuto.”

⁸⁷ Mutangana yani kwani, mulena wa bapolofita kaufela, bakutazi, na ikolwisisa luli kuli na lukile, kuli aipangela manaka ni kubina mwa sibaka sani kaufela, mane ataza lilata lelituna. Na ka leleka mpi yeñwi ya ma Assyrian mwa naha. Kono neli buhata! Linzwi la Mulimu ne li bulezi shutano. Amen. Mwabona, mwakona kuba ni maikuto a lukile, haiba muna ni maikuto kwa mulaho wateni, mufuta o lukile wa maikuto a mo mu utwela.

⁸⁸ Davida na binezi fapila Mulena, mi musala hae a mu seha. Mi Mulimu atalima fafasi ali mwa Lihalimu, ali, “Davida, wena u muuna wa fa pili ya Ka Luli.” Kono milelo ya hae neili ye lukile. Bupilo bwa hae ne bu lukile, kwa mulaho wa bona.

⁸⁹ Kacwalo, bakeñisa fela kuli lukona kuba ni maikuto, ha ku talusi kuli lupiliszwe. Bakeñisa kuli luya kwa kekeke, ha ku talusi kuli lu piliszwe. Musike mwa lumela mioya ye shemaeta yeo. Moya wa niti wa Mulimu, Linzwi la Mulimu la niti, kona Niti ya Mulimu; ili yona Peu ya Mulimu, lika tahisa Mulimu mwa bupilo bwa hao; ube wa bumulimu, ya halaleha ka moya, ya kenile.

⁹⁰ Mwahala sicaba sesiñata lu fumana ko kuna ni maikuto, ni zeñwi cwalo, kutahanga likañi ni lusebo, ni lika kaufela zesina bumulimu. Muzwale, seo ki sifanu se si kola mwa kekeke. Ki mata a dimona. Moya wa baana ni basali baba kopananga hamoho, ni kulika ku kasheza kwahule lika, kubulela kuli, “*Se* ha si si ka luka, ni *se* ha si si ka luka, ni *sani* ha si si ka luka.” Haiba mu ka li latelela hande, linako ze ketalizoho ka zene mwahala lishumi ki yena mutu yasweli kueza lilata, ki yena ya si ka luka. Amen. Mulimu utoile lifapahano mwahala mizwale. Mube ni likute, mube ba bakenile, mulate Mulimu, muyeme ni Yena. Mi haibile fela muziba kuli bupilo bwa mina bu zamaelela hande ni Bibebe, ni kukena kwa mwa pilu, kukena kwa minahano, lilato

ku muzwale wa mina, inge mulika katata kupahama kuyaha Mubuso wa Mulimu, ni kueza lika zani, kutina hande, kupila ka swanelo, kubulela ka swanelo, kuya kwa libaka ze lukile, kona kuli mwakona kuba ni maikuto kaufela o mubata kuba ni ona, mi mutu kaufela uka li lumela.

⁹¹ Jesu naize, “Mu lizwai la lifasi. Haiba lizwai li felelwa ki munati wa lona, kipeto halisana tuso kasamulaho, la yumbiwa ni ku hatikelwa ki batu.” Haiba u lizwai fela unosi, hakuna bunde. Kono haiba una ni munati ku wena, ube ya babela mi lifasi likaba ni linyolwa. Ube ya utwahala kababela, ba kaba ni linyolwa. Oh, mawi!

⁹² Mioya ye shemaeta izwelapili cwalo, ki madimona a ipatile. Mutalime, lu mwa lizazi la mafelelezo. Lu kwa nako ya maungulo. Lifasi se li sutelezi bukaufi ni kutaha kwa toho ya lona, inge sipute fokuñwi se si ka panca leliñwi la mazazi aa mi kipeto sa tula mwatani. Se libile masila. Hakuna mulyani o kona ku li folisa. Ba hanile mu—mu mulyani. Ba hanile kalafo. Mu nge sipute se si sweli kuhula, mi ha mu sa nwi penicillin kamba nto yeñwi ya ku si hamula, kamba nto yeñwi cwalo, sika tundamena fela kuhula kufitela si panca.

⁹³ Seo kona se li ezize lifasi. Ne li kalile, ha ki kale hahulu, kukuta mwa mulaho. Ne ba zwile fa mulelo omutuna, mioya ya buhata ya taha mi ya kala ku bulelela sicaba *se, sani*, kamba *sani*. Ne lu ikabile kukena mwa likopano zelikana mianda ye naini ye shutana, yeñwi ni yeñwi ina ni mubonelo wa yona. Ba li, “Luna lu lumela *se*, kufelile! Kipeto kona fela ze lu lumela.” Habakoni ku lumeleze Moya o Kenile kukena kubona. Habakoni kuba ni tukelo ye lukela. Mulimu nana ni sikwata sa batu se ne sikona kuhuwa, kipeto mañi ni mañi ha huwa. Neba na ni bene bubela ka malimi, mi kipeto mutu kaufela a bulela ka malimi. Baba ni bona kaufela ona cwalo, konji halitoba (sikamañi?) kutala masila ka mioya ye shemaeta, kushemaeta batu kuba ni maikuto a kanti mane hakuna Mulimu ku zona nihanyinyani. Mi kipeto ba zwela kwande mi bapila bupilo bwa mufuta kaufela bo balakaza kupila, mi kipeto ba bubiza kuli ki “Bukreste.”

⁹⁴ Mi lifasi la ina ni kutalimela fela, ni kubulela kuli, “Kihande, mutalimele fani! Ni swana fela sina mo ba inezi.”

⁹⁵ Sina hane Ni bulela busihu bobuñwi ka za kulube, ka za muezalibi. Hamukoni kunyaza. . . Muezalibi ki muezalibi. Musike mwa lika ku mu fetula. Musike mwa lika ku mubulelela *se, sani*, kamba *sesiñwi*. Yena ki muezalibi, ka kukala. Yena ki kulube, ka kukala. Ha zibi shutano niyekana. Haiba uya kwa kubuha mafilimu, mi uya la Sunda, mi uya kwa lipapali za mbola, ni kueza lika ze kaufela, ki muezalibi, ka kukala. Sibupeho sa hae siswana sina kulube. Kulube ya kale ikasheza iminyula ngo ya yona ni kuikenya mwa manyalala ni kuca litoze kaufela zeliteni mwatani, ni lika kaufela; kihande, yani,

ki kulube. Hamukoni ku inyaza. Ki kulube. Kona mo kuinezi ni kwa baezalibi. Kono ha uzwela kwande ni kuipiza kuli u Mukreste, ni ku minyula ngo ya hao hamoho ni yena, kona kuli ha uyomunde ku mufita, kono, wena u mwatasa hahulu kwa bumaswe. Muzwe ku ze cwalo. Muzwe mwa lika za lifasi. Muzwe kuzona. Mu lituhele Mulimu. Muzwe kuzona.

⁹⁶ Kana mutulela cwani zeo? Kacwalo batu babañata ba komoka kacenu, kuli, “Kihande, Muzwale Branham, kana mutuhela cwani zeo?” Ni ziba kuli mu utwile hahulu tuto yeo ka zona, “muitobohe zona.” Batu babañata ba beleka katata ka mifufuzo, kulika kuitoboha lika. Batu babañata ba taha ni kubulela kuli, “Ne ni ka itima lico ka mazazi a mashumi amane kuli Ni eze nto yeñwi.” Ha mutokwi kuitima lico ka mazazi amane. Mu lukela kuitoboha lifasi ni lika kaufela za diabulosi, ni kunga Linzwi la Mulimu mwa lipilu za mina. Mu lukela ku lutiwa mwa kuezeza lika zani. Ha muezi zeo ka kutulakela mwahalimi ni fafasi, kamba nihaiba ku kwanisa zeo ka kuitima lico mazazi a mashumi amane. Mu eza zeo ka pilu ye ipile ku Mulimu Yamata.

⁹⁷ Sina mbututu yomunyinyani. Ni lemuhile mbututu waka kwa mulaho kwani, bo mahe neba lika ku mutinisa baki, kakusasana cwana. Ne ba bata kukenya lizoho la hae mwa lizoho la sapalo. Na palelwa kuikenya lizoho mwateni; ha zibi mwa ku tinela. Mu lukela ku zamaisa lizoho lani. U bata ku kenya lizoho la hae mwateni, kono usweli fela ku fitelela mwateni. Ha fiti mwa lizoho la sapalo. U ziba kuli hasika kenya mwa lizoho.

⁹⁸ Mi kona mo mu zibela kuli hamusika luka ni Mulimu, haiba mu sa seba, kupuma, kueza lika kaufela. Hamukoni kuba baba lukile ni Mulimu, Hanina taba kamba u wa likeleke zekai, konji moyo wa mina ha ufetulwa. Muzwale, zeo ki za kale, kono zeo lika bila mwa pilu ni kubeya mulo mwa moyo wa hae. Luli!

⁹⁹ Alike kubeya lizoho mwahali, ulu lukela ku mu kenya lizoho mwahali. Mi cwale ha sa kenyize lizoho la hae mwa baki yenyinyani ya hae, u ziba kuli u iketile.

¹⁰⁰ Kona mo kuinezi ni ku Mukreste kaufela ya pepilwe sinca. Haiba ukeni luli ku Mulimu, uka tokomela bupilo bwa hae ka Linzwi la Mulimu mi ulemuha kuli uyemi hande ka Lona kaufela. Una ni pilu telele, bunde, kuiketa, musa, mata, tumelo, lilato, tabo, kozo. Ha zukuzehi kafa ni kafa fa inge liwate le li zukuzeha. Hakuna za bilaela nihaiba nto iliñwi. Ha tulaki *fa* ni *fani*, inge kapendelo kaka inzi fa liwate la liñungwa. U tomile hande. Pilu ya hae i kenile. Milelo ya hae i kenile. Litakazo za hae li kenile. Minahano ya hae yeñwi ilukile. Mi uziba kuli uzamaya hande ni Linzwi la Mulimu. Mi lihele halikoni ku Mu zikinyisa. U tomahanyizwe ka Linzwi la Mulimu. Una ni lilato la Bumulimu, kukena ku mwa pilu ya hae, ku muuna ufi kaufela ni musali. Una ni . . . U ikambusize kwa lika za lifasi, li shwile ku yena; ha

li tabeli ni hanyinyani. Kiñi, hamukoni kueza kuli musizana ya tezi Moya o Kenile atine litino ze si za bumulimu zani kusina tuso. Batili, sha.

¹⁰¹ Cwale, hakuna tuso ya ku mu bulelela kuli u fosize, kakuli haana ku ku utwa, kakuli kona fela za ziba kihona. Yani kona tabo ya hae. Musali ya apala tuapalo totunyinyani twani; u zwela fande, mwa manzibwana, ka nako yeo baana ha ba taha kwa lapa; bataha fela ku to ngwenjula lwanda mwa patelo, ili kuli. . . Mi mu ni bulelela kuli zeo li lukile? Musali, Ha ni talusi kuli u—u ya maswe. Ha ni talusi kuli u litanya. Kono ha u lemuhi cwalo, kezeli, kuli moya o masila u ku sweli. Ki sikamañi so kona kuezeza zeo? Una ni ngana ya kuziba kuli ha ku bati. Kwa cisa. Wani ki moya o si ka kena.

¹⁰² Mu li, “Na? Na, Ni ile kwa keleke!” Nebukadinezare neli muuna yomutuna. Kono, kakuli aba ni muikuhumuso, Mulimu amufa moya komu, ni ku mu fulisa bucwani ka myaha yesupa, mane manala a kwa mazoho a hae ahula sina basali babañwi mo ba ezezanga kwanu. Yeo ki niti. Mi akenelwa ki dimona.

¹⁰³ Muuna na kenwi ki mioya mi atubula litino za hae. Ne ba si ka mutinisa liapalo. Mwabona se Ni talusa? Ki mioya ye shemaeta.

¹⁰⁴ Keleke ya henu ya li lumeleza. Mukutazi wa mina wa saba kubulela sika, usaba kuli hamuna kulifa za bulishumi za mina nihanyinyani. Wani kona mulelo. Bwani kona butata. Mawi, bunde! Mu ka kutaza cwani kwa sikwata za bo maankoli, ha mu sa ba sikululeli ku Mulimu, ka kukala? Ba ka comeka lingo za bona mwa lifu nako kaufela. Se mulukela kuba ni sona ki sibaka kwa kunepela manyalala, ni ancafazo ya mufuta wa kale ye ka zukuza naha kuzwa kwa likamba leliñwi kuyofita kwa likamba leliñwi, ni kuba ni basali ni baana baba yemi hande ni Mulimu. Mu tuhele, lika za lifasi! Mu tuhele, mukutalezo wa kunyanyabeka ka bunolo. Amen. Amu kutaze Evangeli. Mulimu u bulezi ona cwalo. “Haiba mulata lifasi, kamba lika za lifasi, lilato la Mulimu mane haliyo ku mina.”

¹⁰⁵ Batu bakona kutulaka mwahalimu ni fafasi, ni kuhuwa busihu kaufela, ni kubulela ka malimi inge ya sela manawa fa mukata wa komu o omile; ba taha ka kuzwelapili cwalo, kakusasana habusa, bana ni kacimacima hahulu ka kulwana ni saha yebuhali, ba yo bulela lika kwa keleke ze ka filikanya keleke kaufela. Ha ki lika lisili mwa lifasi kono ki ku shemaeta, ki mioya ya madimona! Lu bata kukutela kwa Linzwi, koo Mulimu ali yena bunde, kukena. Amen. Yeo ki niti. Mioya ye shemaeta kulwanisana ni Linzwi la Mulimu!

¹⁰⁶ Kiyo muuna fa, ha ki kale hahuku, nana ni musali wa sanana. . . Bakatolika bana ni sikwata tuna sa bona kwani. Mwa nako ya kuyema lupepo kwa hae, za bonahala mwa mazoho a hae ni mwa pata ya hae. Haiba mukutazi yomunde yana ni Moya o

Kenile. . . Na nahana cwalo. Muuna yani nana ni botela ya lika zani, yezwa mwa mazoho a hae, inza ya kai ni kai kutoza batu ka yona. Whew! Sishemo! Ki antikreste! Hanina taba kamba mali a zwa mwa ngo ya hae kamba mwa toho, kamba ki kakai, muzwale, hakuna mali aka nga sibaka sa Jesu Kreste Mwana Mulimu. Ani kona fela Mali anosi e Ni ziba sika ka ona. Wakona kuba ni oli ye suluha mwa lizoho la hawe, ni inge ibuba kuzwa ku leliñwi, kono, haiba mu itusisa zona mwa mufuta kaufela wa bulapeli, ki diabolosi. Kubona bakutazi mo ba ka wela kwa lika ze cwalo zeo!

107 Se lu tokwa, ki kukutela kwa Buka ya Zamaiso, kukutela kwa Linzwi la Mulimu! Le ki lona Linzwi la Mulimu, ili Bibeles ye fuyozwi. Muli, “Kihande, Ni saba kuba cwalo, Muzwale Branham. Ni saba kuli Ni ka latehisa tabo yaka yeñwi.” Ki butata mañi? Ha muzibi kuli tabo ki sikamañi.

108 Ni bulezi kuli ha Ni nyazi cakolwa ka kuya ku yo kolwa. Yena utezi fela sizuhela. Ha zibi. Ha zuha, kakusasana, una ni mabifi, u zuha ni mambengo. Waya ku yo mungela mabotela amabeli kamba amalalu a bucwala, mi uzwela kwande ku yo mu lekela sibamu, ni mifuta yemiñwi yani kaufela.

Muzubi wa kwai wa ina ni kuzuba, ni ku zuseza musu mwa lingo za hae mane inge sitima se si longile libyana. Ku felile. Ha ni mu nyazi; kona fela tabo ya ziba. Ki zona fela za ziba ka zona. Ki kulube, ka sibupeho.

109 Maswabisa ku wena ya ipiza kuli u Mukreste mi uyendamene fa lika ze cwalo kuli ki tabo, kanti mane Evangeli ya Moya o Kenile ha ki sesiñwi kwanda kuba ndu yetezi mata a tabo. Evangeli ya Moya o Kenile kona sino se si kola luli ku mutu kaufela yana ni mambengo. Mu sa inwela fela Evangeli ya Jesu Kreste, mutala Moya o Kenile, mu ka kolwa kufita musiya lifasi le, amen, ki tabo ye sa konahali kubulelwa ni kanya yetezi. Kuna ni mundengu osina mafelelezo. Ki kukolwa ko kusina mafelelezo, wali kukolwa musihali kaufela ni busihu kaufela! Amen. Leo ki Linzwi la Mulimu.

110 Keleke ya taha, i ikungela lika lisili. Bana ni kuba ni mukiti nyana kobana ni kuya kwa likamba lelituna, ku yo bapala. Mukiti wa kukopana hamoho, bakenisa bulikani. Yeo ki niti. Baba ni kubina, linako zeñwi, kwa ndu ya membala yomuñwi, fokuñwi ki mwa litebule za fa keleke. Ba bina, ba añula, balika kufumana sika sa kuba katulusa. Ki butata mañi? Ki sikwata sesituna sa likulube, nihakuli cwalo. Ki likulube, ka kukala. Haiba bakona kutaha ku swalana ni Kreste, ba kaba ni tabo yetuna, lika zani li ka shwa kuba bunsu kufita mwahala busihu, ku bona. Evangeli, ba ka kolwa ka Moya, tabo ye sa konahali kubulelwa ni kanya yetezi.

111 Musike mwa nyaza muezalibi; mu mu utwele makeke. Mu mu lisele fela aizubele fela pipi ya hae, mu mutuhele ainwele mutoho

wa hae, mu mutuhele abe ni kadi ya hae ya mikiti. Yani kona nyakalalo ya hae. Musike mwa mu nyaza. Ha taha kwa ndu ni lika kaufela, inge a katezi ni kutopwela, u bata nyakalalo. Nto ye mu lukela kueza ki kupila bupilo bwa bumulimu kuli mukone ku bonisa ku yena kuli Evangeli ina ni tabo ye teni sauzande kufita zani, ku yena. [Hakuna manzwi fa tepu—Mu.] Mi haiba a shwa mwa buino bwani, u ka ya kwa lihele, ka macwala a hae. Sani ki sifanu sa diabulosi. Haiba a shwa, inge a sweli kutundanisa pipi yani cwalo, Mulimu ki yena Muatuli wa hae. Haiba a shwa, uzwela kwande kwani, inge abina, ni kumatama ni basali ba mitinelo ya butanya, Mulimu ki yena Muatuli wa hae.

¹¹² Kono kuna ni nto iliñwi, haiba u shwela mwatasa tozo ya Mata Moya o Kenile, inge Setefani mwa na ezelize ha talima mwahalimu fa sifateho sa Mulimu, mi ali, “Ni bona Lihalimu kuli li kwaluhile, ni Jesu uyemi kwa lizoho la bulyo,” mu tamehile kuya kwa Lihalimu, inge shakame ya kuuta haikena mwa kandu ka yona. Amen.

¹¹³ Mioya ye shemaeta kulwanisana ni Linzwi la Mulimu! Hamu tamuluhe, muzwe kwateni. “U eza cwani zeo, Muzwale Branham?” Ki kuitoboha fela. Kona fela zemuna ni kueza. Munge Linzwi la Mulimu. Musike mwalika ku tundanisa lika. Musike mwa ya fa katala ku yo lwanisa, ni kuhuwa, “Mulimu, ni fe Moya o Kenile! Mulena, ni fe Moya o Kenile!” Ha u tahangi cwalo, ka kunataka fa katala. Zeo mane ha libeleki. Batili. Cwalo ha ki cona mo U tahelanga. Ki, ku Munga ka Linzwi la Hae!

¹¹⁴ Mutalime ku Pitrosi. Pitrosi nali mwa butata, ne ku bonahala inge kuli uka shwa. Mi abona Mulena ha taha, inge a zamaya fa mezi. Mi ki hali, “Mulena, haiba luli ki Wena, aku ni lumeleze ni tahe.”

Mulena ali, “Taha.”

¹¹⁵ Cwale Pitrosi ali, “Cwale libelela fa muzuzu nyana, Mulena, halubone ni itime lico ka mazazi a mashumi amane, kuli ni bone haiba Na kona kuzamaya fa mezi, kamba nee. O Mulena, halubone ni be ni Moya omukana ku na, kuli Nikna kubinela mwa Moya ni kubulela ka malimi, mwa mukolo wo, kona Ni ka zwa mwateni”? Batili, sha! Na ngile Mulimu ka Linzwi la Hae, tuhela zeo mi u itobohe. Mulimu amu yangwela.

¹¹⁶ Kucwani kambe Mulimu na katani Mushe, mi Abulele kuli, “Mushe, zamaya kwa Egepita, mi ubulelele Faro kuli, ‘Lukulula sicaba sa Ka’”? Kucwani haiba Mushe na kali, “Halubone ni itime lico ka mazazi a mashumi amane, pili, mi ni bone haiba Ni kaba ni tumelo ya ku Ku utwela, Mulimu. Aku nife nto yeñwi, nto yeñwi, Mulena. Ha lu bone ni Ku bulelele nto yeñwi, lubone haiba Ni ka kena mwa Moya, pili”? Mushe na sika buzaka lipuzo, na ngile fela Mulimu ka Linzwi la Hae, ni ku funduka. Cwalo kona mo muezeza lika, munge Mulimu ka Linzwi la Hae.

Konakuli muka ziba mwa ku li ezeza. Na si ka libelela nto yeñwi kuli iezahale, na zwezipili fela mi a li eza.

117 Kucwani ka Elia, fani ha zwa fa Lilundu la Karmele, na inzi fani yetelele? Mi a katana musali wa mbelwa. Musali nali. . . Musali nali muyambaeli, wa Macaba. Mi ha yo mu katana kwani, na sweli kuyakwanela twandilala, mwa patelo. Mi Mulimu amu bulelela kuli, “Zamaya kwa ndu ya mbelwa yani.” Ha ki sibaka ni seo kuli mukutazi aye ku sona!

118 Ki you ya kwa ndu ya mbelwa yani. Mi ha naizize cwalo, nana ni tukota totubeli. Ali, “Ki sikamañi so eza?”

119 Ali, “Inge a yakwanela tukota. Ni na ni fela bupi bo bulikana miñwato yemibeli fela. Kona fela ze Nini ze siyezi. Se li lilimo zetalu kuzwa fo lubezi ni pula.” Mi ali, “Mi Ni ka luba mañende ka bupi bwa mbonyi bo. Mi na ni mwana ke wa mushimani luka ca, mi lushwe.”

120 Mi ali, “Lukiseza na, pili!” Haleluya! Oh, Ni ziba kuli Ni lyangani nyana, kono Ni inzi kwa neku la Mulena, niakuli cwalo. Ali, “Lukiseza na, pili. Kakuli, KISONA SA BULELA MULENA.” Ki fo he cwale.

121 Ki sikamañi seo? “Mubate pili Mubuso wa Mulimu, ni kuluka kwa Hae.” Isiñi Mubuso wa Mulimu ni “lilata nyana,” isiñi Mubuso wa Mulimu ni “maikuto nyana,” isiñi Mubuso wa Mulimu ni “banyinyani bwa se kamba *sani*.” Kono, “Mulimu, ni kuluka kwa Hae, mi lika ze kaufela lika ekelezwa ku mina.” Mubeye pili!

122 Cwale, mbelwa yani na utwile sani. “Tumelo itaha ka kuutwa, ku utwa Linzwi.” Mi ali, “Lani ki Linzwi la Mulena, kakuli yani ki muuna wa Mulimu ya kenile. Yani ki mupolofita wa Mulimu, mi Ni ziba kuli yeo ki niti. Mi leo ki Linzwi la Mulimu.”

123 Cwale, na sika matela kwa ni kwa kuyobuza bapila mabapa ni bona mwa ku ezeza. Na sa lati ku yo ikabela za hae. . .ni kubulelela bayahile mabapa ni bona, kuli, “Cwale, ki sikamañi so nahana? Mukutazi uteni mwa ndu ya ka, ya bulela se. Susie, ki sikamañi so nahana ka se?”

124 Akena mwahali, akala ku sela mwateni. A itoboha. A itoboha zana nani, kuli akone kuba ni zeñata. Seo kona se li tokwa lifasi kacenu, ki mukwa omunde wa kale ka kuitoboha ze munani za kale. Haleluya! A li sulula, kuli akone ku kuliswa. A sulula oli kaufela yana nani yona, ni oli kaufela yana nani hamoho cwalo ni bupi bwana bile ni bona, ku mukutazi, kwa Mubuso wa Mulimu. Mi ha na sa li yubulezi mwani kaufela, Mulimu atuluka, ato taza tubana ya bupi, ato taza ndondo ya oli. A isululela mwateni hape, mwa mukeke wa mukutazi. Mi se I tala, mukeke wani kaufela hape. A isululela mwateni. Nako kaufela ya na sululela mwateni, Na itaza.

¹²⁵ Ni ka bulela cwana, kacenu, haiba akona kusela bukuba bo kaufela bwa kuzwelapili, ni kulikanyisa Bukreste, ni kutuhela Moya o Kenile kunga sibaka sa Ona, ku kaba ni ancafazo ye kaba kwa Eighth ni Penn Street ye ka zukuza naha kaufela. Mutuhele za bukuba. Mukutele kwa Linzwi la Mulimu. Mu sulule, kuli mukone kutaliswa. Mu itobohe, mi Mulimu uka taha mwateni. Mu li sulule, Mulimu uka li taza sinca. Lika ze nyinyani kaufela, za, “Muna ni kueza *se*, mi muna ni kueza *sani*; mi una ni kueza *se* mi mulukela kueza *sani*.” Mulibale zeo! Mu li sulule kuzwa mwa moyo wa mina!

¹²⁶ Muli, “Mulimu, ni lumeleze, kuzwa ka kutala . . . lizazi le, ni be wa Hao Kakutala. Mulena, Ni taha ka pilu ye lobehile. Ni taha ka pilu ye lobehile. Na Ku lata. U ziba kuli Na ku lata. Mi Ni bata kulibala bukuba kaufela bwa za kuitima lico mazazi a mashumi amane ni kubona haiba Ni ka ba bukaufi ni Mulimu, ni *se*, *sani*, kamba *sesiñwi*, ona bukuba bo kaufela.”

¹²⁷ Mutuhele zeo! Hakuna sika mwa Linzwi se si mi bulelela kuli muitime lico mazazi a mashumi amane. Hakuna ze cwalo. Hakuna sika mwa lifasi se si mi bulelela kuli muitime lico, konji haiba ki Mulimu ya ku bulelela. Haiba uitima lico, hauna ku utwa tala, ni kueza lika ze kaufela. Hausweli kuitima lico cwalo, muzwale, ukaba ni nyakalalo ni tabo ka nako kaufela. Uize, “Musike mwa bonahala fapila batu sina baipi mo ba ezeza, ka sifateho se si telele, se si swabile. ‘Ni itima lico ka mazazi mashumi amane. Mikeke yaka haina ku ni kataza ni hanyinyani. Ni felezwi ki lipaundi ze mashumi amalalu, mi ba Ni bulelela kuli ni bonahala hande kasamulaho wa ze.’” Oh, bukuba! Ki mioya ye shemaeta ya diabulosi.

¹²⁸ Mutahe kwa katala, mi muli “kanya, kanya, kanya” kufitela mu palelwa kubulela sika, mi muli, “Mu lukela kubulela ka malimi musika amuhela kale Moya o Kenile.” Bukuba! Amu li sulule zeo!

¹²⁹ Muzuse zeo mwa mulao wa mina mi mutahe kwa Linzwi la Mulimu! Mi ali, “Mubake, mañi ni mañi wa mina, mi mukolobezwe ka Libizo la Jesu Krete kwa swalelo ya libi za mina, mi mu ka amuhela mpo ya Moya o Kenile.” Mulimu ha sa buluki Linzwi la Hae, kipeto Ha ki Mulimu. Amen. Amu li sulule. Mulimu wa litaza. Amen. Whew! Na lata cwalo. Leo kona Linzwi la Hae. Mulimu ki yena yana bulezi cwalo. Yeo ki niti. Mi Mulimu ha bulezi sika, ki Mulimu ya ka si tokomelo. Ku lukile. Litukiso kaufela ze mueza, za kuya kwa keleke kaufela zemukona kueza . . .

¹³⁰ Kuswana fela sina kwa sibaka sa limota kwanu ko ba yahile sibaka sesituna sa limota, kamba, sikwata sesituna sa limota za bazamai. Ne ni belekanga kwani. Mi banga ni kupanga limbasi zetuna zani ni lika zeñwi kaufela, ni kubeya mabala atiile, ka likota za mutondo maneku kaufela, ni lika kaufela handende

fela, ni ku libeya fani fa mukoloko wa zona, mi neli zeshwile sina mapo ye kokotezwi fa sikwalo. Nekuna ni injini, hakuna mukamo ku zona. Na itulezi fela fani.

¹³¹ Se lutokwa kacenu ki mulilo mo ku cisa. Se lutokwa kacenu ki mukamo. Se litokwa kacenu, ki keleke, ye bila; ili sika se si cisa hahulu kuli si cise sibi kuzwa mwa bupilo bwa hao, ki lilato. Mi haiba haukoni kulata yomuñwi, uka lata cwani Mulimu Yo usika bona kale? Lilato li kwahela libi zeñata. Mube mwa lilato ni Mulimu, mi kona mu ka latana, mi kona mu ka lata keleke, muka lata Libaka lateni, muka lata lika kaufela zeli za bumulimu, mi muka inela kwahule ni lika za lifasi.

¹³² Mioya ye shemaeta isweli kuya inge ibulelela batu *se, sani*, kamba *sesiñwi*, “Bana ni kueza *se*. Bana ni kueza *sani*.” Ki mukwa wa kuli likopano li tile, mi lina ni sinulo nyana ya kuli, “Kinande, cwale, Ni lumela kuli mutu. . . Ni lumela mwa nto ye cwalo sina kuhuwa mwa Bibebe.” Yeo ki niti. Yeo ki niti. Ba panga kopano ku zona, “Ha mu huwa, kipeto mu U amuhezi.” Kono hamuna ona.

¹³³ Yatatama u zuha, mi uli, “Kubuela ka malimi.” Yeo ki niti. Zeo li mwa Bibebe. “Kihande, ha u bulela ka malimi, una ni Ona.” Kono babañata ba bona ba bulela ka malimi mi haba sika U fumana kale. Mwabona? Zeo ha ki Zona. Batili, sha.

Buñata bwa bona balil, “Kihande, luna ni kupolofita.”

¹³⁴ Mutalimele bapolifita ba kwanu ni manaka kwa litoho za bona, inge batulaka mwahalimu ni fafasi ni kupolofita. Mikaya ali, “Mina, mañi ni mañi, mwa puma.” Amen. Luli. Mulimu ha tahangi cwalo. Mulimu utahanga kwa pilu ye sephala ye swabile, ni moya o lobehile. “Yena ya zwelapili, inza calela mwa mioko, uka kuta inza nyakalalo hape, inza taha ni lisansa zende ze munati.” Amen. Wa utwa cwalo, mulikani.

¹³⁵ Ki madimona amañata hahulu, madimona a beleka mwa mioyo ya batu! Mu talimele mo li beela miselo. Mutalime mufuta wa bupilo bo mutu apila. Mubone mukwa wa eza lika ka ona, mutalime mwa ezeza lika, mutalime milelo ya hae. Fela ha ku konahali. . . Mi haiba Ni mi bulelezi cwalo, “Nzila yateni fela. . . Ki ze fa limota, kaufela liteni kulo fa. Lihalimu li mwa Charlestown. Hamukoni ku zamaya. Nzila fela yemukona kuya ka yona, ki ka mota. Mi mutu kaufela ya sila museto ulukela kutisa maboki a ketalizoho a mafula a mwa mota.” Ki ye fa mota ya hae, kono haiba haana mafula hakoni ku izamaisa. Kihande, yeo ki niti, kona mo kuinezi ni mwa Lihalimu. Haiba u shwa kusina Mulimu, Hanina taba kamba upilile cwani ni kuli ki limota zekai zo pangile, haiba lilato la Mulimu haliyo mwateni kuli li mi kenye mwa Mubuso wa Mulimu, mu latehile.

¹³⁶ Kuna ni za buhata ni za niti. Hakuna taba kamba za niti li zamaya cwani fa, haiba halina waya ya mwa mubu, halina kutukisa liseli. Yeo ki niti. Muna ni ku beiwa hande ka mibisi,

mube hande mwa lilato la Mulimu. Oh, muzwale! Mutise za negativu ni pozitivu zeo hamoho, mukaba ni Liseli, Liseli la Evangeli ya kale. Mu Li tuhele limonyehe kuzwa likamba le kuisa kwa likamba leliñwi. Hamuna kuba ni Lona kusina zeo. Hakuna taba kamba kuna ni kunjanja kokucwa ni kutulaka ko mukona kuba ni kona hamuli ni pozitivu, mu lukela kuba ni waya ya mwa mubu kuli ilaite liseli. Amen.

¹³⁷ Kana mukile mwa lemuha? Ha mubeya waya mwa mubu fa ku se, ni sika kaufela si yo swala hande mwa sibaka sa mihala ya malaiti, ku yo punya mwa mubu. Mi nako kaufela mutu haba hande mwa Linzwi la Mulimu, lika mu beya hande fa Kalvari, kwabuse, koo ankora isweli hande, kota ya sitoli ya Mulimu ne itisizwe teni, ku to laita Liseli la Evangeli. Amen.

¹³⁸ Mwa ziba kuli butata ki bufi? Batu babali mwa libaka ze bata ze ona ma mochari ao kwanu, baba ipuma kuli bakutazi Evangeli. Mukutazi yomunyinyani natile kuna maabani, ki wa iliñwi ya likopano zetuna hahulu zeliteni mwa naha kacenu, kwande a Katolika. Mi ali, “Muzwale Branham, Na kula mi ni katezi.” Ali, “Ba ka eza kuli luna bakutazi kaufela lu tine mikanjo ni kufetula makola aluna kwa mulaho, ni—ni ku kutaza lika zeñwi. Mi ba ka lu bulelela za kukutaza, nako ni nako.” Mi ali, “Hani koni kuyemela zeo ni hanyinyani.” Mi ali, “Ki sikamañi se Ni lukela kueza? Kana Ni lukela kukala kukutaza Evangeli?”

¹³⁹ Se nili, “Muzwale, haibile fela uinzi ni kopano yani, i kuteke. U bulele fela ze babata. Kono uye ku mutoneli wa mina kamba mubakweli, mi uli, ‘Shangwe, Ni pepilwe sinca ka Moya wa Mulimu. Ki le Linzwi la Mulimu. Haiba uka ni lumeleze kuli ni Li kutaze, Ni ka ina mwa kekeke ya hao. Haiba ha u lumeli, Na zwa. U fe zeo ku mutu yomuñwi.’” Yeo kona nzila ya kueza ka yona. Usike wa potoloha sileze. Usike waba kwa neku la negativu. U tahe mi ubulele seo sili sona. Luli.

¹⁴⁰ Mi ali, “Muzwale Branham, u nahana kuli Ne nikaba ni kopano?”

¹⁴¹ Se nili, “Ko kuinzi Situpu, teñi koo Limbande lika kopana.” Yeo ki niti, lika latelela.

¹⁴² Inge muuna cwana, nako yeñwi, yana ndondozi likuhu. Cwale, ha ki lisheha. Ha ni talusi ka mukwa wa lisheha. Ni talusa cwalo ka butokwa. Na yo be kuhu ya hae, na sina mai amañata. A beya lii la pato fateni. Mi cwale kaufela ha to ndondoka, pato neli yona inosi yene bonahala kusehisa hahulu kwa lika ze ikile yabona kuhu fateni. Kacwalo nasikuku nasweli kubulelela tuzwinyani twa hae mi tukuhu kipeto twa taha, kono pato neisa zibi mushobo wani. Kono, zazi leliñwi, nasikuku yani atuisa fande a sishete. Nekuna ni kasa kwa mulaho wa sishete. Ka pato ka mwana kani ha ka to nunkelela mezi, ka ya kulatelela mezi katata luli. Kuhu ya mushemi ya bulela yali, “cluck, cluck,

cluck.” Mi kapato ka kakanyinyani kali, “honk, honk, honk.” Ne ka libile kwa mezi. Kiñi? Ne kali kapato, ka sibupeho. Ha ka yo nunkelela mezi, muzwale, ne ba si ka zwa mwateni, kakuli neli pato.

¹⁴³ Mi Ni bulela cwana kacenu, batubafi kaufela baba bata kufumana Mulimu luli, Habana kulumeleza keleke kuba bulelela lika zeba sakoni kupila ka zona, *sani* kamba se *siñwi*. Haiba muna ni sibupeho sa Mulimu ku mina, mukaya ku ze kenile. Mu kaya kwa nto ye lukile. Mu ka yemela lika ze lukile. Muka eza lika ze lukile. Mu ka nahana lika ze lukile. Mu ka pila mwa muka o lukile. Haiba u pato, uabela mezi. Haiba u Mukreste, uabela Kreste. Haiba u diabulosi, uabela lika za diabulosi. Haiba u maankoli, u ka ca lika ze shwile. Haiba u kulube, u ka ca siloko. U inzi kai kacenu? Luli. U bulela kuli uinzi fahalimu fa, usweli kuca lika za Mulena, mi kipeto ushetumuka kuyo ikambota ni diabulosi. Kuna ni se si fosahalile ku zona. Tuhela ku teezeza kwa mioya yeo; ki mioya ye lunya. Hakuna taba kamba una ni kuyema unosi. Baana ni basali babakile ba fiwa likute lifi kaufela, luli, ibile baana ni basali bene ba yemi banosi ni Mulimu.

¹⁴⁴ Mutalime ku Mikaya, mwa na yemezi fani; isiñi sina licwe la Gibraltar, kono ki Licwe la Myaha myaha. Mi ali, “Hakuna se ni ka bulela. . . Hanina taba kamba mukopano ubulela sikamañi. Hanina taba kamba kopano yaka ibulela sikamañi. Hanina taba kamba mulena ubulela sikamañi. Haiba ba ka ni puma toho, Ni ka bulela fela seo Mulimu aka beya mwa mulomo waka kuli ni bulele.” Na bulela niti. Na bulela niti.

¹⁴⁵ Mi kacenu, baana ni basali, musike mwa iseza ngana ku zeo lifasi li mi bulukezi, mo li mi ezeza, kuli ki mufuta mañi wa mulyani wa likokwani o banani, ni kubulela kuli, “Haiba muikopanya kwa keleke, mukaba fela hande.” Wani ki mulyani wa buhata. Kiñi? U sa na ni butuku bwa sibi. Yeo ki niti. Kono Na mi bulelela nto iliñwi, muzwale, ye ka mi fa mulyani kuzwa kwa sibi, bao, ki babatile kwa Mali amande a Mulena Jesu Kreste mi ba talizwe ka Moya o Kenile, mi ona aka ku zwise kwa sibi kaufela, ni litakazo za hao likaba za Lihalimu, mi hauna kuba ni nako ya kuba ni lika za lifasi.

Ha lu lapeleni.

¹⁴⁶ Ndata luna yakwa Lihalimu, ha lubona mioya ye shemaeta ye haitaha fa batu, ni kuziba kuli basweli ku keshebisa lika za Mulimu, Na lapela, Mulimu, kuli U kone kuswala muuna kaufela ni musali mo kacenu. Le kateni haibe lizazi, Mulena, kuli ba lemuhe kuli bupilo bwa bona ha bu zamaeleli ni Linzwi. Mi ba bile ba teezeza kwa lika ze fosahalile, kuli diabulosi ubile aba omba omba ka mitende ya Likande la Niti la mwa magazine, litaza ze bolile za kale za lifasi, ni siswaniso sa kale se si boniswa fa televishini. O Mulimu, lika ze sa konahali zani kuli Mukreste

ali talime! Mulimu, za lu kulisa. U bulezi kuli ne li Ku utwisa bumaswe, sina mataza. U bulezi kuli, “Nja ikutela kwa mataza a yona, mi ni—ni kulube iya kwa sileze sa yona.” Nja ya kale haikona kutaza nto yeñwi. Haibona fateni licika la lisapo la kale, le lina ni kuba cwalo, mutu wa buipi yataha kwa katala, mane inge kuli mu ka taza lifasi; kuzwelapili ona cwalo, u kutela hape kwateni ku yo ca lika zeswana zani hape. O Mulimu, ukenise Ndu ya Hao, Mulena. Haleluya! Luma Moya o Kenile ka kuikolwisisa kwa mufuta wa kale o ka kenisa litakazo za micleo ya mutu ni kukenisa moyo wa hae, ni ku mu kenisa ku muezza kuba sibupeho sa Lihalimu. U mufe. . . Ku ncaafaza bunca bwa hae ni buitamo bwa hae sina mbande, kuli akone kupahama mwahalimu ni kufutelela lika za lifasi, ni ku lenda mwa Lihalimu koo akona kubona matata asa tahela kwahule hule kafoo. Lumeleze cwalo, Mulena.

¹⁴⁷ U swaniseze bapolofita ba Hao ku bona, kwa limbande, bene bana ni liito la mbande, nebakona kuya mwahalimu hahulu ni kubona lika ka nako yetelele li si ka fita kale. O Mulimu, fuyola keleke ye nyinyani ye. Fuyola sicaba se si tahanga kwanu se. Fuyola baenyi babali mwa minyako ya kacenu. Mi ha ba zibe kuli Liñusa le ha li sika tiswa ku mutu ka minahano ya butu fela, kono li tisizwe ka kuzamaelela, Mulena, ku bani babali mwa kutokwa luli; ka kuziba kuli zazi leliñwi lu ka yema hamoho mwa katulo ya Mulimu, ni ka kuziba kuli luka yo ikalabela ka kuziba Niti mi lu sa I buleli. Ndate, Ni lapela kuli I kone ku amuhelwa mwa pilu kaufela. Ka Libizo la Jesu.

¹⁴⁸ Ka litho ka luna zeinami fa nako nyana, Ha ni zibi haiba kuna ni yomukana mo kakusasana cwana yaka bulela kuli, “Muzwale Branham, Na kula mi ni nyikwile lika za kale ze. Ni bile ni lika zenyinyani ze bile li ni kumalezli fa nako yetelele hahulu. Ni—Ni bile ni bulelanga ka zona kamita. Ni—Ni eza lika ze Ni sa lukeli kuezanga, mi Na ziba cwalo. Ze sa swanelo ku Mukreste. Hani tabeli kuezanga cwalo; Mulimu u ziba kuli ha Ni tabeli cwalo. Mi ha Ni sa lata kuteeleza kwa moya wa kale wani nihanyinyani. Ki sika se si ni beile fafasi hala bupilo bwaka kaufela, kwa kuba ni lilato la luli ni tukuluho ku Krete. Ni bata kuli u ni lapelele kwateni, Muzwale Branham, kuli sikone—sikone ku ni siya lizazi le.” Ha mu nanule mazoho a mina? Toho kaufela inge iinami. Mulimu ami fuyole. Oh, mawi, ki mazoho amañata luli! Lika za kale zesina tuso zani, lika zenyinyani za kale ze mi eziza mulomo kamba likañi nyana mwa keleke, ze mi ezisa kuzamaelela ni lika zeñwi cwalo. Oh, ze si za bumulimu. Ko ki kulyanganisa mwahala mizwale. Mi musike mwa eza cwalo. Ha mutokwi zeo. Ha mu tokwi zeo ni lika ze nyinyani zani, tucimacima twa kale ni lika zeñwi kaufela, kuli li mi inise fafasi.

¹⁴⁹ Muli, “Mulimu, Ha ni lati sika seo hape. Ni katezi mane ni nyikwile ka zona. Ni itukisize kacenu kuli ni li hane. Na taha cwale, Mulena, mi Ni bata kuba kwahule ni za buitato bwaka

kaufela. Haiba nji muzwale waka ha ni ezi hande, Ni ka mu lapelela nihakuli cwalo. Haiba nji bondate ha ba ni ezi hande, Ni ka ba lata niteñi. Haiba nji musala ka ha ni ezi hande, kamba bo muuna ka, Ni ka ya, ka kuikokobeza, fapila Mulimu. Mulena, Ni talimela fela kwa Mubuso wa Hao. Ni bata kuli munahano waka ube o namile hande. Ni bata kuli pilu yaka itale fela tabo. Ni bata kuzwela kwande, haiba butata luli bu ni beile mwahali, Niteni ni sa bata kunanulela mazoho aka mwa halimu ni pilu yaka fapila Hao, Mulena, ka kuziba kuli, zazi leliñwi Ni ka konapa ni Wena. Ni bata mufuta wa kutwisiso ye cwalo. Mulena, ni eze cwalo, kuzwa lizazi le.”

¹⁵⁰ Kana mwakona kunanula mazoho a mina, kuna ni si ka nanula lizoho la hae fa nako nyana. Mulimu ami fuyole. Mulimu ami fuyole. Kezeli, aku lufe munembo nyana halunze lu inamisize litoho za luna. Kikuli mutalusa cwalo kufita kai? Musike mwa bapala cwale. Ye ha ki nako ya kubapala. Ye ki nako ya kuamuhela. Ye ki nako yakuli mu Li amuhele. Amutahe, muli sululele mwateni cwale. Nji cwani? Amutahe, mufe kaufela ze munani ku Mulimu. Muli, “Mulimu, Hanina zeñata hahulu. Na ni mufumahali fela yanyezwi mwa lapa. Hanikoni kueza zeñata hahulu, Mulena, kono Na—Na kona kubala Bibeke ya Hao, Na kona kulapela zazi ni zazi. Na kona kusulula masila kaufela ainzi mwa munahano wa ka. Na kona kusulula lika zeo kaufela kwande. Nina ni mulatu wa lika zeñata hahulu za bulezi mukutazi yani kakusasana cwana, kacwalo Na—Na li sulula kacenu. Ha ni li lati. Mulimu, uni taze ka lilato. U ni taze ka lika ze ni latisa sila saka sesi maswe hahulu se Ni nani. Na lata cwalo luli, Mulena.”

¹⁵¹ Hasweli kuliza cwalo fa, kikuli hamulati kutaha cwale mi muyeme kwa pili fa nako nyana, halunze lu kopana ka linzwi la tapelo. Haiba mu talusa zeo cwale, haiba muitukisize ku itoboha zona luli, hamuna kuzwa kwa katala kwanu kacenu ni zona zeo mwa lipilu za mina, haiba mu ka taha ka busepahali. Ni kubulela kuli, “Ni taha fela kwanu ku yo yema fela, fa muzuzu fela, Muzwale Branham, eehe, hamunze mu na ni linzwi la tapelo hamoho ni na, mina kasibili.” Ni—Ni bata kuli mutahe, mulapele. Kana mwa taha cwale? Ka litoho za mina zeinami, ki mañi yaka nanuha ni kutaha kwa katala, kuto yema kwa katala?

Si ni fiteleli, O Mupulusi wa musa,
Utwa kulila kwaka kwa kuikokobeza;
Ha U sweli kubiza babañwi,
Oh, usike wa ni fitelela.

Mupulusi, Mupulusi,
Utwa kulila kwaka kwa kuikokobeza;
Ha U sweli kubiza babañwi,
Oh, usike wa ni fitelela.

¹⁵² Hakuna taba kamba ubile Mukreste fa nako yetelele cwani, mi usana ni mioya ya kale yani yene ku bulelisanga, yene ku filikanyanga ni kufelega mwahalimu, yene ku ezisa kuli usebe mutu. Haiba mutu utaha ni kukala kubulela ka yomuñwi, wa kena kapili mwateni mi, oh, ni ku mu fitela kwahule. Zeo li fosahalile, muzwale. Usike wa eza cwalo. Zeo li ka kubeya kwahule ni Naha ya sepiso. Haiba una ni lika zenyinyani za kale zo sa lukeli kuba ni zona, haiba lilato la Mulimu luli haliyo mwa pilu ya hao, kana wena kalibe ni wena ndate tuna, ha utabeli kuyema ni kubulela kuli, “Mulimu, ona fa Ni ka li sululela kwanade, kakusasana cwana, ona fa. Ni ya kwahule ni katala ka nili mutu ya shutani.” Kana mwa taha nji?

¹⁵³ Kana kuna ni muezalibi ya si ka amuhela kale Jesu, mi uziba kuli u muezalibi, ha u Mu zibi ka kuba Mupulusi wa hao? U li, “Muzwale Branham, eeni, Ne ni hupula kuli Ni na ni minyaka yemiñata hahulu. Ni ya kwa kubina ni kwa mikiti ni lika zani kaufela. Na buhanga mafilimu a maswe kaufela. Mi Ni—Ni balanga libuka ze maswe. Ni balile libuka za kale zena ni makande a swabisa ku zona. Na ikolanga ku li bala.” Muzwale, kuna ni se si fosahalile ku wena. Yeo kona takazo ya micelo ya hao; mwabona, mu ni lumeleze ni bone za balanga mutu, mutuhele ni bone za buhanga, ni teezele kwa lipina za teezanga.

¹⁵⁴ Ka zazi leliñwi, hane ni taha mwa mota, mutu yomuñwi cwana ato sutelela bukaufi mi na tukisa silimba sa ka, nekuna ni lipina zeñwi ze masila. Se nili, “Tima sika seo. Ha ni lati kuteezeleza ku zeo.” Neli lipina za kale za boogie-woogie cwalo.

Ali, “Kiñi, Na lata cwalo.”

Se nili, “Sibupeho sa hao si fosahalile. Ufosahalile.”

¹⁵⁵ Hane Ni li kwanu, mazazi nyana kuzwa fani, kwatuko ni lilundu, ne ni sweli kushuta, ni mutu. Linyunyani zani ne li sweli kulila. Tutaha ne tusweli kutoliya kueza lilata. Kampolwe ne ka sweli kufufa fufa mwahalimu, kamba kampolwe, ne ka opela minembo. Na huweleza mushimani yani, Na li, “Talimela, mushimani, zani kona lipina za ka. Zwelapili kuliza ona zeo. Seo kona silimba saka. Mulimu wa ni lumelanga zona kuli liopele ha Ni li kwanu. Za katulusa moyo wa ka.”

¹⁵⁶ Ki zende mane kufita ni lipina za bukuba za kale, ona ma juke box asweli kutaza lilata, ni kulila cwana, kuli mane hamukoni neba kuwela mwa sibaka sa kai ni kai. Ki lico za diabulosi. Ki ndu ya diabulosi, kaufela zona lina ni sibi. Kana mina kaufela mu swasehile kwande kafoo mi mwa li tabela? Ha ba beya masheleñi ani mwa bi bokisi byani, mi kipeto ni masila ani kaufela ataha mwateni, mwa ikolanga zona nji? Maswabisa ku mina. U mutu ya wile mwa tumelo. U kwahule ni Mulimu. Ha u mu zibi Mulimu. Kambe no mu ziba Mulimu, mwa swalelo ya libi za hao, no sike wa teezanga kwa bukuba bo bucwalo bwani.

Ne lika shwa ku wena. No—no ka li taza. Ha u li tabeli. Lico za hao ki zende. U lata Mulimu. Kana ha utahi kakusasana cwana, ukubame fa hamoho ni baiouleli ba kakusasana cwana?

¹⁵⁷ Ki ba baana ni basali baba kubami kwanu, baba bile Bakreste mwahala lilimo. Ha ni nyanyifazi bukrete bwa bona. Kono se Ni lika kueza ki ku ba bulelela kuli diabulosi yani, yasweli kuba kataza, yasweli ku ba inisa kwahule ni nyakalalo yetezi. Moya o Kenile ki nyakalalo. Muzwale, Na zuha inge ni kozwi, Ni ya kwa musiyoy inge ni kozwi, Ni kozwi musihali wo kaufela, ni kozwi busihu kaufela. Oh, Na fela—Na fela na lata ku. . . Ni ya kwa kuyamba, fela Ni, “Si ni fiteleleli, O Mupulusi ya musa. Utwa kulila kwa ka kwa kuikokobeza.” Ni ya kwa kuzuma, ni opela milumbeko ya Mulimu. Na kutaza, Na. . . kai ni kai ko Ni ya. Kana ha mu lati kuba cwalo? Babatezi Moya o Kenile, Wa mi katulusa. Oh, mawi! Ha mu ba utwa ha ba opela lipiza za kale za masila zani, mina muopele ye:

Ni tamehile kuya kwa Naha ya sepiso,
Ni tamehile kuya kwa Naha ya sepiso;
O ki mañi ya ka ya ni na?
Ni tamehile kuya kwa Naha ya sepiso.

Ni tamehile kuya kwa Naha ya sepiso,
Ni tamehile kuya kwa Naha ya sepiso;
O ki mañi ya ka ya ni na?
Ni tamehile kuya kwa Naha ya sepiso.

Ki lili ha Ni ta fita mwa pumulo ye fuyozwi
yani,
Ni kuba ya fuyozwi kamita!
Ki lili fo Ni ka bonela pata ya Ndate,
Ni kupumulela mwa sifuba sa Hae?

Ni tamehile kuya kwa Naha ya sepiso,
Ni tamehile kuya kwa Naha ya sepiso;
O ki mañi ya ka ya ni na?
Ni tamehile kuya kwa Naha ya sepiso.

¹⁵⁸ Kikuli ha mutahi, mu zamaelele? Ni hupula mwendi batu baba mianda ye ketalizoho ba luna bene ba yemi kwani inge Ni kolobeza baba mwanda ni baba mashumi amabeli, ka yona nako ya mwaha ye, ona kwanu kwa makamba a nuka, fani Naleli yetuna ya Kakusasana yani haito tuluka inge ibenya fa nuka. Haleluya! Linzwi la bulela kuzwa Mwani, lali, “Zazi leliñwi uka hasanya Evangeli mwahla lifasi kaufela.” Kana kukonahala cwani kuli mubotana, wa mushimani, ya si ka ituta akone kueza cwalo? Ki sishemo sa Mulimu! Amen.

¹⁵⁹ Oh, ki mañi ya ka taha luye? Mu zwe ku zeo, mubeye kwatuko, bukiti kaufela cwale. Musike mwa teezeza kwa mioya ye shemaeta yani. Mutahe, mu to teezeza kwa Linzwi la Mulimu, KISONA SA BULELA MULENA! “Mbuyoti ki yababa na ni tala ni linyolwa la kuluka, kakuli ba ka kuliswa.”

160 Ha lu inamiseni litho za luna halunze lu lapela ni babali kwa katala baa.

Bana babande, Ni bata kuli mu hupule, kakusasana cwana, muteni fo kuli mubeye kwatuko bukiti kaufela. Muteni fo kuli mubeye kwatuko bukiti kaufela ni sibi se si mi imela ka bunolo. Paulusi na bulezi cwalo, mwa Maheberu, kauhanyo ya 12.

. . . cwale halubona kuli . . . lu beilwe mwahali ki lilu le lituna la lipaki, lutuhele kaufela ze luimela, ni sibi . . . se si lu hanelela fakaufi, . . .

Mi ze Ni ka bulela hape ki lifi? kakuli . . . ni ka taelelwa ki nako . . . hanika bulela za Gidioni, . . . ni Balaki, Baraki, . . . ni Samisoni, . . . ni Jefita; ni Davida . . . ni Samuele, ni baplofita:

Bao ka tumelo ba hapile mibuso, ba sebelize niti, ba fumana zene ba sepisizwe, ba tibile milomo ya litau,

Ba timile mata a mulilo, ba bandukile kwa buhali bwa lilumo, mwa kufokola baezize ba batiile, mi mwa ndwa . . . ba sabisize . . . limpi za lila . . .

Basali ba fumani ka zuho bafu ba bona . . .

Mi babañwi ba nyandiswa maswe, babañwi ba nyandiswa ka kushubulwa, . . . mane kufitelela zeo, ka mawenge, mane ni ka litolongo:

Mi—mi babañwi bene ba nani miliko . . . kushubulwa . . . kushapiwa, . . .

. . . kaufela bona bao bapakilwe hande ka tumelo ya bona, . . .

Mi bona bao kaufela, ni ha bapakilwe hande ka tumelo ya bona, ha ba si ka amuhela ze ne ba sepisizwe:

Kakuli Mulimu na lu bonezi zende kufita, kuli bale basike ba fumana kupetahala luna lusiyo kwateni.

Cwale ha lubona kuli . . . lu beilwe mwahali ka lilu lelituna la lipaki, lu tuhele kaufela ze luimela, ni sibi . . . se si lu hanelela fakaufi, mi lu zamaye inze lumata ka kuitiisa mwa siyano ye lukiselizwe luna,

Lunze lu talimile Jesu yena mutateti ni mufelelezi wa tumelo ya luna; kabakala tabo yana beezwi kwapili a itisa kwa sifapahano, asa tokomeli lishwau la sona, mane . . . ayo ina ku la bulyo la lubona lwa Mulimu.

161 Jesu, mwa tapelo ya Hae, naize, “Ndate, Na ikenisa Ilina.” Jesu a keniswa, kwa Keleke. Na ka nyala, kono Na si ka eza cwalo. A keniswa. Mi ali, “Ba kenise, Ndate, ka Niti. Linzwi la Hao kona Niti.”

162 Cwale halu beyeni kwatuko buima kaufela. Una ni kacimacima? Una ni sesiñwi ka wena, ze ku ezisa kubulela ha u sa lukeli kubulela? O Mulimu! Li lule foo cwale. Li beye

foo, mutalimele Mulilo wa fa katala ha utaha fafasi ku to li felisa. Mutalimele lilato la Mulimu ha li tukisa lika. Mutalimele buitati bwa kale bwani kaufela, mukwa o bulelanga ni musala hao ka ona, mukwa o bulelanga ni muuna hao, mo bulelelanga ni bo yahile mabapa, mo bulelezi ka batu ba mwa keleke, mu li luli fa katala kakusasana cwana, mi Mulilo wa Mulimu uka taha ku to li ciseleza, mi lilato la Bumulimu li ka cisa mwa sibaka sa lona.

¹⁶³ Muna ni butuku? Mu li beye fa katala, muli, “Mulena, ki se fa. Bupa kuna pilu ye kenile. Bupa kuna mata a kufolisa.” Mubone sa ka eza Mulimu. Mulimu uka eza cwalo kakusasana cwana.

¹⁶⁴ Ndata luna yakwa Lihalimu, lu inama fapila Kubateni kwa Hao, bakeñisa kuyemela kwateni babali fa katala. Tuhela kuli sishemo sa hao si suluhele ku mañi ni mañi wa bona, Ndate. Cwale sina bona. . . Mulena, Ha ni koni kuba ezeza zona. Bana ni ku ikezeza zona bona bañi. Hakuna mutu yakona ku ba ezeza zona. Bana ni ku ikezeza zona bona bañi. Tuhela mioyo ya bona cwale ibulele mwahala bona kuli, “O Mulimu, kacimacima ka, Ni kabeya fafasi fa, Mulena. Hanina ku ka lwala ni kamuta. Hakuna taba ka ze taha kamba ze ya, Ni ka li tuhela fela liikele, kuzwa cwale kuya kwapili. Lulimi lwaka lolubile bunolo kwa kunga siemba ni sikwata sa basebi, Mulena, Ni lu beya fafasi fa. Hanina ku lu shimba ni kamuta. Kenisa lulimi lwa ka, Mulena. Tuhela kuli Mangeloi atahe ku lona, sina Isaya ha na bulezi kuli, ‘Ni wa milomo ye masila. Bumai ki bwaka!’” Mi Lingeloi la taha, la nga lishala lelituka, mi la ya fa aletare ni ku yo nga lishala la Mulilo, ni ku libeya fa milomo ya hae ni ku mu kenisa. Mulimu, kenisa mubuleli kaufela, kakusasana cwana, baba bulela ze maswe ni kucala twaniso. Lumeleza cwalo, Mulena.

¹⁶⁵ Matuku kaufela aliteni mwa muyaho mo, batu ba bakula, ka ku ziba kuli ki mioya ye lunya, hape. Mulimu, sina mutanga Hao, Na a kalimela, ka Libizo la Jesu. Ha a zwe ku mutu kaufela ya kula. Mi cwale mutu kaufela ya masila, yana ni mihupulo ye masila, matapa, litakazo, baana ni basali, ona cwalo, Mulimu, li zuse ku bona. Ba kaufela kulo fa baba sweli kueza katata kutuhela makwai, ni tuno nyana to tu katulusa, ni mikiti nyana, ni lika za buitati; Mulimu, natifaza lipilu za bona ka Moya o Kenile ka mukwa wa kuli lika zani halisana kuba ni takazo ni kamuta. Halina kuba ni sibaka; mu tezi hahulu Moya o Kenile, kuzwa fani kuya kwapili.

¹⁶⁶ Mulimu, eza keleke ye kuba sicacani se situka mulilo. I eze ibe sibaka sa Moya o Kenile, i eze kuba Mulilo o tuka, kuli lifasi likone kufetuhela kwatuko kuli libone kanya ya Mulimu. Mulimu, kala ka batu babalikani fela ba, mwendi ki mianda yemibeli fela mo kakusasana cwana. Lumeleza cwalo, Mulena.

¹⁶⁷ Kenisa pilu ifi ni ifi, mu Methodist kaufela, mu Baptist kaufela, mu Katolika kaufela, mu Presbyterian kaufela, mu

Pentekota kaufela. Mulena, li zuse mwa pilu kaufela, mi ha ba tahe ku Wena kacenu. Lumeleza cwalo, Ndate. Ni ba beya ku Wena, mi ni ba fa ku Wena, ka Libizo la Jesu Krete, kwa ku keniswa kwa mioyo ya bona ni foliso ya mibili ya bona. Amen.

¹⁶⁸ Ha ni zibi, fa katala, kana musiile mutiyo wa mina? Kana muikutwa kuli isali fateni foo? Haiba muikutwa kuli liteni ku lo mo, wena u be muatuli. Ki wena yasweli kulapela. Na ni kutalize. Mina mwa lapela. Kana mutiyo wa mina usiyezi foo, muzwale, kezeli? Kana mwakona ku asiya foo ona foo? Haiba mwakona, mu nanule lizoho la mina, muli, “Eehe, Mulimu, cwale Na li siya fa. Shutano yaka, Ni ka li siya fa katala fa.” Ku cwani he, kushetumuka kutaha kwa mafelelezo a katala fa, kwa silyo saka, kalibe? Kana wa kona ku li siya foo? Kikuli wa kona kusiya mutiyo tuna wo foo? Muli, “Eeni, tumelo yaka italimela ku Wena, Wena Ngunyana ya Kalvari.” Halunze lu iopela hamoho cwale.

Tumelo yaka italimela ku Wena,
Wena Ngunyana ya Kalvari,
O Mupulusi Yapahami;
Cwale utwa ha Ni lapela,
Takula sibi saka kaufela,
Oh kuzwa kacenu
Ni be wa Hao ka kutala!

¹⁶⁹ Halu yemeñi cwale, lube ka likute luli, mañi ni mañi. Cwale muteeleze ka swanelo, mañi ni mañi cwale. Kusike kwaba ni yomukana ya ka zwa. Fela . . . Sebelezo ha isika fela. Ni bata kuli mube ni kupetahala ko kukenile, tokomelo yetuna luli.

Haninze Ni zamaya mwa lififi la bupilo,
Ni manyando ani beya mwahali,
U be Muzamaisi waka;
Fetula lififi libe musihali,
Takula mioko ya maswabi,
Mi kuzwa la kacenu
Ni be wa Hao ka kutala!

Musike mwa iopelela ku yemuli mabapa ni mina cwale. Mukwale meeto a mina, mi ha luiopele ka bunya, halunze lu nanulela mazoho a luna ku Mulimu.

Haninze Ni zamaya mwa lififi la bupilo,
Ni manyando ani beya mwahali,
U be Muzamaisi waka;
Fetula lififi libe musihali,
Takula mioko ya maswabi,
Ni sike na latehela
Kwa hule ni Wena.

Nina ni Ndate yali mwabuse,
Nina ni Ndate yali mwabuse,
Nina ni Ndate yali mwabuse,
Kwa neku la mwabuse.

Oh, zazi leliñwi Ni ka yo Mu bona,
 Zazi leliñwi Ni ka yo Mu bona,
 Zazi leliñwi Ni ka yo Mu bona,
 Kwa neku la mwabuse.

Oh, zazi leo ikona kuba kamuso,
 Zazi leo ikona kuba kamuso,
 Zazi leo ikona kuba kamuso,
 Kwa neku la mwabuse.

¹⁷⁰ Hani zibi cwale, ki ba bakai babana ni ndate kwa naha ya mwabuse? Halu boneñi lizoho la mina. Ki ba bakai babana ni me mwa Naha ya mwabuse? Halu boneñi lizoho la mina. Ki ba bakai babana ni Mupulusi mwa Naha yeñwi? Halu boneni lizoho la mina.

Kikuli haina kuba mukopano wa tabo nji!
 Kikuli haina kuba mukopano wa tabo nji!
 Kikuli haina kuba mukopano wa tabo nji!
 Ili kwani kwa . . .

¹⁷¹ Ni bata kuli mueze nto yeñwi. Cwale halunze lu opela cwalo hape, Ni bata kuli muswalane mwa mazoho ni yomuñwi fakaufi ni mina, mi muli, “Muzwale, kezeli, ni lapelele kwateni, kuli Ni yo kopana ni wena mwa Naha ya mwabuse.” Musike mwa eza cwalo konji haiba mutalusa ona cwalo. Ki ba bakai baba tabela kuli lu yo kopana? Ki ba bakai baba tabela kuli ni yo mi katana mañi ni mañi kwanu, kulo Kwani? Luna, luli lu tabela cwalo. Cwale ha lu swalaneñi mwa mazoho, mi luli, “Ni bata ku yo ku katana, muzwale. Ni bata ku ku katana kwa neku leliñwi.” Cwale halunze lu opela kuli, “Nina ni Mupulusi mwabuse mwani.” Ku lukile.

Nina ni Mupulusi yali mwabuse,
 Nina ni Mupulusi yali mwabuse,
 Nina ni Mupulusi yali mwabuse,
 Kwa neku la mwabuse.

Oh, zazi leliñwi Ni ka yo Mu bona,
 Zazi leliñwi Ni ka yo Mu bona,
 Zazi leliñwi Ni ka yo Mu bona,
 Kwa neku la mwabuse.

¹⁷² Kana seo ha si mi utwisi hande ni munati? “Jesu, uni buluke pila sifapahanp.”

Jesu, u ni buluke pila . . .
 Kokuna ni liweluwelu lelinde,
 Tukuluho ya mutu kaufela, ki nuka ye folisa,
 Ye buba kuzwa kwa liweluwelu la Kalvar- . . .

Mañi ni mañi amu nanule mazoho cwale.

Kwa sifapahano, kwa sifapahano,
Kube kanya yaka kamita;
Kufitela moyo waka hauka fumana pumulo
Pumulo mwabuse bwa nuka.

Kwa sifapahano, kwa sifapahano,
Kube kanya yaka kamita;
Kufitela moyo waka hauka fumana pumulo
Pumulo mwabuse bwa nuka.

Na Mu lata, Na Mu lata
Kakuli U ni latile pili
Ni kuleka puluso yaka
Fa Kalvari.

Ku lumbwe Mulimu!

¹⁷³ Halu inamiseni lito ho zaluna cwale ka kukuza. Mi ka nzila yaluna yende, halu Mu lumbekeni ni mazoho mwahalimu, luli, “Na itumela ku Wena, Mulena, ka kupilisa moyo waka. Na itumela ku Wena, Mulena, ka ku ni folisa. Na itumela ku Wena, Mulena, kwa lika kaufela Zo ezize, ka kutisa kutamuluha kokunde, ka kutisa puluso yesina tifo. Na itumela ku Wena, Mulena.” Lu Ku fa nubu ya buitumelo ye. Lwa Ku lumba kakuli U yomunde hahulu. Wena u Palisa yamwa Mukulo, u Naleli ya Kakusasana, u Palisa ya Sharoni, ki wena linto Kaufela mwahala linto Kaufela. Ki wena Ndate, Mwana, Moya o Kenile; Ki yena ya Naliteni, ki Yena Yaliteni, mi Uka Taha; Alfa yomutuna, Omega. Ki Wena Yomunde, ili Mulena wa Kozo, ni Mubisi wa Mwana Davida. Wena uli linto Kamukana! Mi lwa itumela ku Wena, Mulena, kwa lika kaufela Zo ezize. Lwa itumela ku Wena kwa Linzwi la Hao, kakuli Ki Liseli la mwa nzila ya luna. Oh, lwa lapela, Mulena, kuli U lu lumeleze kuzamaya mwa Liseli. Lumeleza cwalo, Ndate. Ka Libizo la Jesu Krete. Amen.

Ku lukile. Halunze luina fa muzuzu fela. “Luka zamaya mwa Liseli.”

Luka zamaya mwa Liseli, ki Liseli lelinde,
Leli taha ko kunela maloteli a sishemo;
Libenya mwahala luna, ka musihali ni busihu,
Jesu, ki Liseli la . . .

¹⁷⁴ Ki fo cwale, ba bakenile, ha lu iopeleñi cwale!

Luka zamaya mwa Liseli (busweu, kukena),
Liseli lelinde,
Leli taha ko kunela maloteli a sishemo;
Libenya mwahala luna, ka musihali ni busihu,
Jesu, ki Liseli la lifasi.

Mutahe, mubulele za Hae kuba Mulena wa
mina,
Jesu, ki Liseli la lifasi;

Mi milangu ya Lihalimu ika nela,
Jesu, ki Liseli la lifasi.

Kaufela!

Luka zamaya mwa Liseli (Liseli la mwa nzila
yaka), Liseli lelinde,
Leli taha ko kunela maloteli a sishemo;
Libenya mwahala luna, ka musihali ni busihu,
Jesu, ki Liseli la lifasi.

¹⁷⁵ Kana ha li miutwisi bunde? Ki ba bakai babaikutwa hande?
Ha mu nanule fela lizoho la mina cwale, muli, “Ni ikutwa
fela hande luli.” Moya o Kenile u mi suluhezi. Konakuli lu
ka (sikamañi?) zamaya mwa Liseli. Musike mwa teezeza ku
mutu ufi. . . Liseli ki sikamañi? “Linzwi la Hao ki Lumonyi.”
Kacwalo he:

Luka zamaya mwa Liseli le, ki Liseli lelinde,
Leli taha ko kunela maloteli a sishemo;
Libenya mwahala luna, ka musihali ni busihu,
Jesu, ki Liseli la . . .

¹⁷⁶ Cwale, ha ki nto yende yeo? Kubonahala inge halukoni fela
kukwala. Moya o Kenile u lu sweli! Nji ha mu utwi cwalo? Ku
utwahala fela kuli . . . ? . . . Ku bonahala fela kuli za taha.

Evangeli isweli kulota mali,
Mali a balutiwa baba shwezi Niti,
Evangeli ya Moya o Kenile ye isweli kulota
mali.

Wa pili kushwela mulelo wa Moya o Kenile wo,
Neli Joani Mukolobezi, kono a shwa sina mutu;
Kona kutaha Mulena Jesu, ba Mu takisa,
A kutaza kuli Mioya ya batu ipiliswe kwa sibi.

Kuna ni Pitrosi ni Paulusi, ni Joani musinuli,
Ba file bupilo bwa bona kuli Evangeli ye
ibenye;

Ba kopanya mali a bona, sina bapolofita ba
kale,

Kuli Linzwi la niti la Mulimu li bulelwe ka niti.

Mi ba pobaula Setefani, akutaza kulwanisa
sibi,

Aba filikanya hahulu, ba pyata toho ya hae;
Kono a shwela mwa Moya, a pumehelwa ki
moya,

Mi ayo kopana ni babañwi, nyangela yefa
bupilo yani.

I sa lota mali, eehe, I lota mali,
Evangeli ya Moya o Kenile i sa lota mali,
Mali a balutiwa baba shwezi Niti,
Evangeli ya Moya o Kenile i sa lota mali.

Amuutwe!

Kuna ni mioyo mwatasa aletare, ye lila kuli,
 “Ki lili?”

Fo Mulena aka fa koto baba fosize;
 Kono kuna ni babañata baba kafa mali a
 bupilo bwa bona
 Kuli Evangeli ya Moya o Kenile ibe mali a
 Kenisa.

Izwelapili fela kulota, haleluya, Isweli kulota
 mali,

Ni bata kuba alimuñwi wa bona.

Evangeli ya Moya o Kenile, I lota mali,
 Mali a balutiwa ba bashwezi Niti,
 Evangeli ya Moya o Kenile ye i salota mali.

¹⁷⁷ Ni tabela kuli kukalela kwa katala. Amen. Oh, ha ki bunde ni boo! Mizwale ba hesu bafile bupilo bwa mali a bona. Ku kaba babañata baba ka eza ze swana. Musike mwa bilaela. Li taha kwa kuswabiswa cwanoñu fa. Ikana yaba kuli muka kena mwahali kamba kuya kwande. Basweli kuikopanya cwale mwa Katengo ka Likeleke, mi kaufela bakena mwateni. Basweli kutaha hamoho kaufela bona.

Mi kukaba babañata ba ba kafa mali a bupilo
 bwa bona,

Kakuli ki Evangeli ya Moya o Kenile ye ni
 muunda wa Yona okenisa.

Isweli ku lota mali, eehe, Isweli kulota, (Oh,
 haleluya!)

Evangeli ya Moya o Kenile ye isalota mali,
 Mali a balutiwa ba bashwezi Niti,
 Evangeli ya Moya o Kenile ye, I salota mali.

¹⁷⁸ Mawi! Ni utwa inge kuli Kuungelwa kuinzi fela fahalimwa keleke. Oh, li nieza fela kuikutwa hande luli! Libi kaufela li mwatasa Mali. Mwabona, Moya o Kenile ulata Linzwi. Linzwi kona seo Moya o Kenile ufepa ku sona, mwa bona. Oh, mawi! Utaha fafasi ni kukena mwahala sicaba, ukenisa libi za bona, u zwise matuku a bona, u zwise mambengo abona. Cwale Ni kozwi, ni kozwi luli mo Ni kona kubela, ni kozwi Moya, lilato lisweli kukena mwa pilu yaka. Hakuna taba kamba mutu akile aeza sikamañi, li swalezwi. Sila sa mina se si situhu maswe, zeo kaufela lifelile. Yo kaufela yakile abulela sika kaufela, haiba Ni...kihande, Ni...zeo kaufela li icongile, kaufela li kenisizwe cwale.

Mi I lota mali, eehe, I lota mali,
 Evangeli ya Moya o Kenile isalota mali,
 Mali a balutiwa ba ba shwezi Niti,
 Evangeli ya Moya o Kenile ye . . .

Oh, mawi! Ha ki bunde!

Ha ki nako kwa bunde ni yeo ku mina,
Ha ki nako kwa bunde ni yeo kuna;
Haiba kaufela lu itukisa kukopana ni Jesu
Mulena luna,
Ha ki nako kwa bunde ni yeo mo ikabela.

Nako yende ku mina,
Ki nako yende ku na;
Haiba kaufela lu itukisa kukopana ni Jesu
Mulena luna,
Ha ki nako kwa bunde ni yeo.

Mwa lata cwalo? Batu kaufela, kifo he!

Oh, ha ki nako kwabunde ni yeo,
Ki nako yende ku na;
Haiba kaufela lu itukisa kukopana ni Jesu
Mulena luna,
Ha ki nako kwabunde ni yeo.

¹⁷⁹ Ni ikutwa fela inge kuli ancafazo ya mufuta wa kale iteni mwa keleke. Mina boo? Ki kukeniswa fela kwa kale, kwa suluha; bunde, ki nako yende ya kale. Kana ha muikutwi hande? Oh!

Ni ka Mu lumba, Ni ka Mu lumba,
Mulumbe Ngunyana ye shwezi libi.

Halu iopeleni cwale, mutu kaufela. Mwa ziba cwalo? Na lata cwalo. Mutahe kwanu; aku ni tuse kuiopela, Muzwale Neville. Mi kaufela mina, hamoho cwale, halu nanuleni mazoho aluna, lu iopele, cwale, cwale, haiba mwakona.

Mulumbe Ngunyana ye shwezi libi;
Mu Mufe kanya, mina batu kaufela,
Kakuli mali a Hae atapisize sibi kaufela.

¹⁸⁰ Cwale, kaufela, ki fo he!

Ni ka Mu lumba, Ni ka Mu lumba,
Mulumbe Ngunyana ye shwezi libi;
Mu Mufe kanya mina sicaba kaufela,
Kakuli mali a Hae atapisize sibi kaufela.

Amen. Seo ki sesinde nji?

Munzi o musweu Twaa,
Nina ni munzi, harepa, ni mushukwe;
Cwale Ni libelezi, na libelela ni kulapela,
Kakuli Munzi o musweu na uboni Joani unzo
shetumuka.

¹⁸¹ Amen. Bunde! Oh! Cwale halu yemeñi, kaufela. Ni sepa muikutwa hande. Muhupule lisebelezo busihu bo. Cwale lubata kuopela pina yaluna yende, ya ku lukuluha ka yona.

Ka Libizo la Jesu lwa kubama,
 Luwa ka mañwele kwa mahutu a Hae,
 Mulena wa malena mwa Lihalimu luka Mu fa
 mushekwe,
 Fo musipili waluna ha utafela.

Ku lukile. Mutu kaufela cwale, hamoho. Ku lukile.

Ka Libizo la Jesu lwa kubama,
 Luwa ka mañwele kwa mahutu a Hae,
 Mulena wa malena mwa Lihalimu luka Mu fa
 mushekwe,
 Fo musipili waluna ha utafela.


Libizo Lelinde (Libizo lelinde), Oh kwa
 munati! (Oh kwa munati!)

Sepo ya lifasi ni tabo ya Lihalimu;

Libizo Lelinde (Libizo lelinde), Oh kwa
 munati! (Oh kwa munati!)

Sepo ya lifasi ni tabo ya Lihalimu.

¹⁸² Ha ki kakusasana kwa bunde! Ha ki nako kwa bunde! Halu inamiseni litoho za luna fa nako nyana. Mañi ni mañi atalimele ku Krete cwale, Mupulusi wa mina. Mwa mukwa wa kukuza, Ni bata kuli mu Mufe buitumelo ni milumbeko. Muli, “Mulena, Ni itumela hahulu ku Wena ka ku kenisa moyo waka. Ni itumela hahulu ku Wena kwa lika kaufela Zo ni ezelize. Tuhela Moya wa Hao ube fahalimwa ka mwahala lizazi, Mulena. Ni zamaise. Ni etelele. Ni fuyole.” Mulimu a lumeleze mbuyoti yeo ku mina, kona tapelo yaka.

Cwale halunze luinamisa litoho za luna, Muzwale Neville, u lu lukulule ka linzwi la tapelo. 

MIOYA YE SHEMAETA LOZ55-0724

(Enticing Spirits)

MUKOLOKO WA KUITUTA KAZA MADIMONA

Liñusa le ka Muzwale William Marrion Branham ne li kutalizwe lwa pili mwa Sikuwa la Sunda kakusasana, Sikulu 24, 1955, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi i hatizizwe ni kuhasanyiwa ki ba Voice Of God Recordings.

LOZI

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleñi ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org